

Gobierno ta informa cu Secrets lo habri na december y mañan tin otro caso di “Handhaaf” na Corte



Pagina 3

- **Aruba a pasa pa
codigo Oranje
den incidente
di derame for di
Trinidad & Tobago**

Pagina 2

- **Trahadonan di
Domesa a bay
den protesta**

Pagina 2

- **Dia 1 di maart ta cuminsa
e campaña nacional
pa eleva seguridad den
trafico**

Pagina 4

Exitoso Full Moon Bike Tour di IBiSA Sportcentrum San Nicolas



Pagina 18

Rapport ta haya cu gobierno Hulandes a faya pueblo



Pagina 8

20 region di Peru den emergencia sanitario pa casonan di dengue



Pagina 10

Crisis Management Office:

Aruba a pasa di codigo Geel pa codigo Oranje den incidente di derame for di Trinidad & Tobago

Aruba tabata monitor for di dia 12 di februari 2024 e incidente di derame di petroleo na Trinidad and Tobago. Den e fase di monitor aki na Aruba ta wordo considera cu ta den fase GEEL, segun Crisis Management Office.

Actualmente nos a haya e confirmacion cu na nos ruman isla di Bonaire y Curaçao a constata patchnan/teer di e oil spill cu a yega na nan costa. E situacion aki a pone cu Aruba a pasa pa codigo ORANJE, cual ta significa cu ta pasa pa standby pa cualkier eventualidad.

E fase oranje aki den e plan di accion pa locual ta regarda Oil Spill pa Aruba ta, cu asina cu Bonaire sinti efecto di un



Oil Spill Aruba ta pasa pa e fase ORANJE/standby. Den e fase aki lo pasa na costanan regularmente y monitor si

por constata patchnan/teer cu por a yega nan nos costa.

Accionnan cu lo tuma den

caso cu constata patchnan/teer di azeta na nos costa:

Accion di limpieza inmediato;

Si e ta na un di e sitionan cu publico ta landa;

Si e ta na un di e sitionan cu turtuga tin neishi of cu nan ta usa pa nan neishi;

No ta tuma accion inmediato;

Tur patch/teer riba barancanan esakinan lo keda si nan no ta representa riesgo pa hende of bestia.

Di parti di Crisis Management Office (CMO) Aruba ta haci e yamada na tur persona cu ta bishita nos costanan den e dianan nos dilanti pa yuda tira un bista pa asina wak si ta detecta cualkier señal di patch/teer di azeta. Den caso cu constata algo por reporta esaki na e-mail cmo@crisis.aw; na telefon 588-0100 of app +297 592 9600.

Potret di LoopT&T.

Temporada di turtuga ta bay cuminsa na Aruba

Temporada di turtuga Driekel of Leatherback esun di mas grandi di 7 especie di turtuga marino na mundo ta bay cuminsa trempa den Caribe e aña aki, unda ya caba na Merca nan a cuminsa haci nan neishinan y pone webo, sinembargo, esaki tambe ta depende en gran parti di e comportacion humano.

Manera ta conoci, varios especie di turtuga marino ta bin na Aruba pa traha nan neishi, nan ta bin den temporada specifico, semper ta cuminsa despues di carnaval na luna di maart te luna di juli. E prome cu ta bin esun di nan mas grandi cu ta e Leatherback Sea Turtle, na Aruba conoci como "Driekel" y despues ta bin Hawksbill Turtle cu por

traha neishi te cu luna di november.

Turtuganan ta un especie protegi na nivel internacional for di aña 1990, basa riba e Cartagena Convention e cual ta un tratado internacional cu ta proteha bida marino y den particular e bida migratorio (especienan cu ta landa di un pais pa otro).

E peligernan mas grandi pa e turtuganan ta e costanan cu a ser desaroya, pa motibo cu e turtuganan ta busca e luz artificial di anochi, e ta un animal cu ta bin pa traha su neishi den oranan di anochi y e kier un beach cu ta scur, esey ta un problema cu cada aña ta bira mas dificil pa haya, no na Aruba so, na henter mundo.

Otro peliger cu e turtuganan ta enfrenta ta e botonan y jet ski cu ta den lama, e turtuganan mester subi riba e super-



ficie pa nan por hala rosea, na e momentonan aki hopi di nan ta muri pa via di jet ski y botonan cu ta pasa rond sin ripara cu tin turtuga cerca di nan.

E temporada pa e turtuga traha neishi ta di maart te juli, e turtuga muhe ta subi riba tera y ta busca e luga mas adecua pa traha su neishi, ta

hopi importante pa e personanan sa cu den e fase aki no mester stroba e turtuga, pa motibo cu nan lo por back den awa sin pone e webonan. Desaroyo di e costa cu ta creciendo cada aña pa via di compania di construccion tambe ta un peliger pa turtuganan pa motibo cu nan ta traha hotel of condominio cu

luz riba e beach.

Ta p'esey cu si ta yega di mira un turtuga cerca di e beach den oranan di anochi pa tene na cuenta cu no mag di cende luz pa nan, ni saca potret cu flash y yama instancia concerni, den e caso aki TurtugaAruba.

Trahadonan di e compania Domesa a bay den protesta

Dialuna mainta, manera diferente medio di comunicacion a reporta, trahadonan di e compania Domesa a bay den accion di protesta pa un tempo indefini, pa motibo di mal contenido pa cu diferente situacion cu ta sucede en e compania.

Den pasado trahadonan di e compania a yega di pone trabao plat caba pa diferente

situacion, pero e protesta di ayera mainta especificamente tabata relaciona cu un disputa ariba e pago di oranan overtime cu e trahadonan ta traha. Pa motibo di e discusion aki y falta di pago, trahadonan a pone pia abao y a bisa cu si no tin pago di overtime pues nan ta bay opta pa no traha overtime mas ora cu e compania tin mester.

Otro punto di malcontento

entre e trahadonan ta e hecho cu e compania lo a busca un persona di afo, un stranhero y a pone e persona aki traha di biaha sin cu e persona aki tin su paplanan di residencia regla, pues den otro palabra e persona ta traha ilegalmente den e compania.

Esaki ta un punto di enfoke pa e trahadonan mirando cu e trabao diario di e trahadonan ta eherce ta encera cu nan tin

cu deal cu placa y obhetonan di balor y pues cu un persona ilegal trahando nan no por para responsabel si en caso cu algo ilegal mester sucede.

Ademas di esaki ta parce cu e compania a contrata otro trahado pa traha den weekend, pero e trahadonan no tabata na altura di esaki y no sa ta ken e trahado aki ta.

Manera ya caba menciona e trahadonan di e compania

en cuestion tin algun tempo caba tin cu soporta y traha cu situacionnan cu ta causa malcontento y frustracion entre e trahadonan.

Cu e accion di protesta aki e trahadonan kier expresa nan malcontento pa e hecho cu e compania no ta cumpli cu nan pago di overtime, pero si ta contrata otro personanan, entre otro trahado ilegal, pa traha pa e compania.

Gobierno ta informa cu Secrets lo habri na december y mañan tin otro caso di “Handhaaf” na corte

Ayera mediante un comunicado di prensa Gobierno di Aruba a informa comunidad cu Hotel Secrets lo habri pa fin di año 2024, importante tambe ta pa destaca cu mañan di aranson ta bay tuma luga na corte un otro caso relaciona cu hotel na unda habitantenan a pidi na Gobierno di Aruba pa “Handhaaf.”

Gobierno di Aruba a informa cu Minister President Evelyn Wever-Croes a reuni cu desaroyadornan di hotel Secrets na San Nicolas. Desaroyadornan tabata tin e bon noticia cu nan ta trahando pa keda cla cu e prome fase di e hotel pa fin di e año aki, 2024. Un total di 300 camber ta habri fin di 2024 y e demas cambernan ta wordo construi den fase 2 cu 300 camber na 2026, y den fase 3 cu 300 camber mas na 2028.

“Esaki ta un noticia hopi positivo pa San Nicolas y pa Aruba. E hotel aki lo ta e prome hotel grandi pa San Nicolas y cu lo genera un desaroyo grandi pa San Nicolas y pa esnan cu ta biba pariba di brug.



Esey tabata nos compromiso cu San Nicolas, pa trece bida back den San Nicolas, y nos ta logrando”, minister president Evelyn Wever-Croes a accentua.

Nan ta considera cu esaki lo ta bay ta un era nobo pa San Nicolas, “pa Gabinete

Wever-Croes II, desaroyo di San Nicolas ta un prioridad y p’esey ta traha duro pa logra yega na un solucion pa cu e proyecto aki. Prome minister a indica cu pa Gobierno e proyecto aki ta uno di gran beneficio mirando cu e lo crea oportunidad laboral

y un crecemento economico pa Aruba na San Nicolas y vecindario. Tambe, Gobierno ta invertiendo hopi placa den embeyecemento di diferente area incluyendo Baby Beach y Rodgers Beach.”

Tabata september di año pasa ora prome minister a duna un ultimo update di e desaroyo di e hotel aki e cual ta bin presentando varios caso na corte den ultimo 3 año, den esaki el a sigura cu e tabata sinti su mes preocupa pa loke ta trata e situacion di hotel Secrets Baby Beach unda algun ciudadano ta buscando nan derecho pero di otro banda, nan como gobierno ta kere den proyecto aki.

E tempo ey, hues a pidi pa traha un decreto nobo teniendo na cuenta cu algun instruccion specifico cu corte a duna y e departamentonan encarga riba esey, e contestacion segun prome minister a indica a bay recientemente pa e habitantenan.

Na october 2023 habitantenan a manda un comunicado di prensa indicando cu nan no tin ningun responsabilidad pa decisionnan tuma contra ley, al contrario, e habitantenan cu a protesta pa e magnitud di e proyecto hotel Secrets semper a haci uso di ley pa adverti Gobierno y indirectamente Three Rivers, cu e proyecto no ta cuadra cu ley y no ta cumpli cu e condicionnan di bienestar pa e bisindario. E habitantenan aki tambe semper a informa gobierno den tratamiento di casonan na corte cu nan no ta contra di desaroyo turistico,

pero e otorgamento di un permiso di construccion tin cu bay a base di ley y maneho. E obhecion contra e hotel Secrets cu ta andando for di 21 di october 2020, tambe a urgi pa no construi y evita haci gastonan innecesario. Construccion riba e hotel Secrets a cuminsa despues di a tuma nota di obhecion di habitantenan y contra tur e peticion di habitantenan pa no construi.

Sin embargo di ta na altura di e advertencia di parti di e habitantenan, Gobierno a bay asina leu di hasta tuma e decision di elimina e ley cu tabata protege Aruba di cualkier posibel claim di parti di inversionistanan. Gobierno a elimina e articulo 59 di ordenanza di construccion y Vivienda di Aruba cu tabata automaticamente para cualkier construccion ora cu ricibi un obhecion. Y asina proteha Aruba financieramente si un inversionista bin cu un claim miyonario pasobra e obra a para. Debi cu ta ley a para e obra y no un decision di Gobierno.

A ser manda diferente carta di advertencia pa adverti Gobierno y Three Rivers pa para e construccion y evita tur e gastonan innecesario. Gobierno tabata na altura di e articulo 59 di ordenanza di construccion y Vivienda di Aruba y toch a laga construccion di hotel Secrets continua. A base di esaki habitantenan por conclui cu Gobierno a tuma tur responsabilidad na momento cu no a para e construccion di hotel Secrets manera ley ta stipula. Bou ningun circunstancia por culpa habitantenan cu ta haci uso di nan derecho cu ley ta duna di a ‘laga’ Three Rivers haci inversionnan cuantioso. E tabata un riesgo cu e compania mes a tuma y no por sconde tras di posicion di Gobierno, mirando cu e caso ta den man di Corte y huristanan di e compania mes ter por compronde con ley ta cana.

Igualmente, ta importante pa menciona cu hasta año pasa tabatin un accion di firma apoyando e construccion di e hotel aki cu segun Bon Dia Aruba por a confirma, esey no a ser usa den Corte, ya cu no ta un instrumento legal riba un decision di hues.

Mañan un otro caso lo tuma luga na corte pa loke ta trata “Handhaaf” y Bon Dia Aruba lo keda pendiente di e caso aki pa informa comunidad.



Dia 1 di maart ta cuminsa e campaña nacional pa eleva seguridad den trafico



Ayera mainta durante un conferencia di prensa di gobierno Minister di Husticia y Asuntonan Social, Rocco Tjon, a anuncia e lansamento di e campaña nacional pa seguridad den trafico, campaña “Trafico Sigur”, cu lo enfoca ariba eleva seguridad den trafico.

Minister Tjon a indica cu añanan anterior e cadena hudicial a enfoca hopi ariba e delitonan di alto impacto, y cu presentacion di tur e cifranan aki tambe, por a wak un reduccion significativa pa loke ta criminalidad na Aruba.

El a menciona cu dos siman pasa un investigacion imparcial a tuma luga cu a duna como resultado cu Aruba ta e pais mas sigur den Caribe.

E mandatario remarca cu a aworaki e cadena hudicial ta bay pone tur nan forsa hunto pa percura pa eleva seguridad den trafico a traves di e campaña nacional aki cu ta bay enfoca riba diferente aspecto. E campaña ta ranca sali dia 1 di maart y tin como meta mehora seguridad den trafico, reduci e accidentnan y salba bida.

Minister Tjon a señala cu na año 2022 Aruba a conoce 7.341 incidente pa loke ta trata trafico y den tur e incidentenan aki tabatin un total di 13.069 persona involvi.

“Mi ta kere tur hende ta comprende e impacto cu esaki tin riba Aruba, riba e seno familiar, riba nos economia. Nos ta papia di perdida di bida cu ta afecta salud di famianan, personanan. E ta afecta e situa-

cion financiero di cada hogar, pero obviamente e ta afecta e parti di empleo tambe pasobra ora un persona ta involvi den un accidente e no por bay traha y tin consecuencia pa e famia, pero tin consecuencia pa empresario tambe. E ta punto cu nos mester duna atencion,” el a subraya.

E mandatario a splica cu na december año pasa gobierno a inicia e proceso caminda nan a acerca diferente compania pa duna nan oferta pa yuda e cadena hudicial ehecuta e proyecto aki. E compania ganador ta bay duna conseho na gobierno durante un año largo pa asina por ehecuta e proyecto aki.

El a agrega cu tin un comision tambe cu a wordo institui, comision trafico sigur. E comision aki tin represen-

tacion di Cuerpo Policial den dje, e compania ganador, di Ministerio Publico, di Ministerio di Husticia y Asuntonan Social y tambe di e companianan di seguro pa atende cu tur aspecto cu tin di haber cu e fenomeno aki.

E comision aki a bin ta reuni ya caba for di januari den un forma structural pa por presenta e campaña nacional aki cu ta cuminsa dia 1 di maart.

Minister Tjon a indica cu e campaña trafico sigur ta bay enfoca riba educacion y conscientisacion, pa educa pa asina por preveni accidentnan den trafico. E enfoca, el a señala, lo ta riba velocidad halto, core bao di influencia y distraccion den auto, manera por ehemplo uso di celular.

Banda di esaki, el a agrega, gobierno ta bay lansa un website, traficosigur.aw. El a sigui splica cu riba e website aki tur informacion lo ta disponibel y e ta bay conta tambe cu un seccion interactivo caminda tur persona por haci nan pregunta y ricibi nan contesta pa duna contenido real na e parti di educa y conscientisa y preveni accidentnan di tuma luga.

“E ta bay conta cu participacion di pueblo. Ta bay tin diferente encuesta cu lo wordo lansa riba e website aki pa di e forma ey tin participacion di comunidad tambe y nan tambe por señala situacionnan di trafico cu nan ta considera peligroso y di e forma ey nos ta percura pa nos enfoca riba e situacionnan ey pa preveni accidentnan di auto,” el a resalta.

El a agrega cu ta bay tin tambe diferente mensahe ta bay wordo emiti durante full un año largo a traves di tur e canalnan tradicional cu ta trata media.

Minister Tjon a indica cu apart di enfoca ariba e parti di conscientisacion y prevencion, el a resalta cu di otro banda ta importante tambe pa percura pa e parti di controlnan tuma luga.

El a splica cu hunto cu e proyecto aki, na mesun momento, a base di diferente otro decision tuma for di e parti di husticia, hunto cu Cuerpo Policial a dicidi cu ta bay emiti un kalender interno pa loke ta trata tur e diferente

control di trafico cu lo bay keda tuma luga na un manera structural.

E mandatario a sigui splica cu nan a tuma e decision tambe pa amplia e capacidad pa loke ta trata e Unidad Motorisa di Cuerpo Policial. El a indica cu nan ta bay haya tur persona cu tin mester pa tur e motornan cu e unidad ta dispone di dje tambe por wordo usa pa garantisar mas seguridad den trafico.

Di otro banda, e mandatario a agrega, Ministerio Publico ta bay haya mas personal. El a splica cu a tuma e decision pa tuma tres persona extra especificamente pa por procesa tur e boetnan cu ta wordo skirbi door di Cuerpo Policial y nan ta bay crea tambe mas zittingscapaciteit na corte.

Minister Tjon a menciona cu aworaki tin 300 caso pendiente di 2022 y 2023 pa loke ta trata especificamente core bao di influencia. El a indica cu ya caba dos siman pasa nan a reuni cu presidente di Corte Comun y a dicidi cu ta bay percura pa mas personal pa corte pa haal in e 300 caso cu tin pendiente.

El a anuncia cu año aki tambe gobierno ta bay introduci un proyecto piloto titula ‘snelrecht’. Esaki kiermen cu tur persona cu comete un infraccion pa loke ta trata trafico, despues di un periodo cortico, e caso lo wordo presenta dilanti hues.

Por ultimo Minister Tjons a splica cu nan ta bay facilita Cuerpo Policial su trabao pa entre otro kita vehiculonan cu no ta cumpli cu tur rekisito for di caminda.

“Nos tin e proyecto di opslagbewing y takeldienst pa KPA. Den luna di maart tur compania cu ta interesa por entrega nan oferta y di e forma aki un decision ta bay wordo tuma pa wak cua compania ta gana esaki pa asina 24 ora pa dia tin takelwagen disponibel pa e agentenan policial por kita vehiculonan di caminda. Na mesun momento tin un tereno grandi cu ta bay wordo prepara pa tur e vehiculonan aki por wordo staciona eynan y e compania aki lo maneha full e proceso den nomber di Gobierno di Aruba,” el a finalisa.



Editor

Caribbean Speed Printers N.V.
 Aruba Bank N.V. Acc. #332668
 Caribbean Mercantile Bank N.V.
 Acc. #23951903
 RBC Royal Bank Acc. #13307728

Operations Manager

Mariette Engelhart

Redaccion

noticia@bondia.com

Pilar Flores (hefe di redaccion)
 Angenette Figuereo (closer editor)
 Leo Maduro
 Andreina Morillo
 Raisa Montilla
 Oriana Geerman

Ehecutivo di Benta

sulaika.croes@cspnv.com

Sulaika Croes

Aviso y Arte

Sandra Loefstop

Lisa Tromp

Departamento Digital

Juan Luis Pinto

Administracion
 accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
 Pablo Libre

Press

Roland Schenker (Hefe)
 Omar Ramirez
 Martin Boekhoudt
 Francis Dirksz

Colaboracion

Associated Press
 Ret Karibense
 Data Key

Afiliacion

Sociedad Interamerica
 di Prensa (SIP)

DIRECCION

Adres: Weststraat #22
 Tel: 582-7800
 Email: noticia@bondia.com
 aviso@bondia.com
 info@bondia.com
 Website: www.bondia.com
 Facebook: @bondianoticia
 Instagram: bondiaaruba

BON DIA ARUBA ta un corant redacta y imprimi na Aruba y ta obenibel di dialuna te cu diasabra. Ningun contenido por wordo reproduci sin permiso di editor.



Editorial

Serlimar no ta... Salba ainda...?

Nos companianan estatal ta 'autonomo' of no? Esey ta e pregunta cu ta bin dilanti den e caso di e empresa estatal Serlimar, recientemente den noticia a traves di e ministro encarga cu e cartera ey. Supuestamente e empresa ta opera segun e reglanan estableci den su estatuto, bao di un gerencia cu na su turno ta bao supervision di un hunta directivo. Pero, awor ta e ministro ta anuncia cu e empleadonan a haya atrobe nan salario completo, plus nan 'bevoording' y 'periodiek', termino tipico di empleado publico, como si fuera nada no a cambia desde como 20 aña pasa cu Serlimar a bira un persona huridico riba su mes. Kico ta pasando aki?

Nos mester kere cu en berdad nada no a cambia y cu e mandatario concerni, completamente den e estilo tradicional di antaño, ta anuncia progreso pa por 'cobra politicamente' pa e bon noticia aki? No tabata mas logico pa laga henter e asunto den man di e dirigencia legal di e persona huridico? Y pakico nos ta trece esaki dilanti? Pasobra esaki ta un di e lineanan cora cu ta keda core den nos gobernacion cu no tin pakico di ta eyan. Desde cu a cuminsa pone varios entidad estatal fuera di alcance directo di gobierno, pa nan supuestamente actua riba nan mes, nos no ta experimentando nada otro cu al fin y al cabo, ora ta conveni, ministronan ta muestra cu ta nan ta dirigi e asunto. Pero, tambe ora ta conveni, nan ta core enfatiza 'autonomia' o hasta 'independencia' di un entidad asina. Despues di tur loke a pasa den ultimo añanan, Serlimar no ta muestra di a logra un cambio den esaki, cu trahador mes dependiente di politica.

E ministro a bin tambe cu e tema di e 'surseance van betaling' cu a yega na un final. E medida di suspension di pago aki, ordena pa corte, a ser pidi cu un monton di critica pa otro ministro na 2020, den un situacion financiero cu no tabata laga otro alternativa, aparentemente. Nos a publica ampliamente riba e tema aki na e aña ey, unda for di e cuentanan anual a bin resulta, via e rapport di accountant, cu gran parti di e debe cu e empresa tabatin, tabata cu gobernacion mes... Y no por a yega na un solucion pa esey? O tabata trata - atrobe - di e patrañanan politico tipico di stroba mandatario di e mesun gabinete, pero cu na e momento ey caba a haya e label di 'enemigo'? Tanto tempo despues en todo caso por constata cu e ministro, cu despues a paga e cuenta cu su retiro, tabatin razon den scoge e ruta di suspension di pago, pa evita bancarota. Logicamente e medida hudicial aki a trece cune cu e empresa a bay bao di e supervisor nombra pa corte, algo cu

en general nos politiconan no gusta, pasobra di e manera aki a duna 'pottenkijkers', entre nan publico en general, un vistazo den cushina di e compania, pa hopi politico ainda considera como propiedad estatal y por lo tanto 'propiedad politico' di esun cu ta na mando. Y na e tipo di suceso aki nos por ripara cu transparencia ainda ta un asunto fragil. Aparentemente, e actual mandatario, aunke supuestamente representando un partido nobo y progresista, ta mira Serlimar como un empresa estatal, yena cu ambtenaar, cu tur nan derechonan y, eventual lealtad politico...

Lo no tabata mihor cu den tur e añanan cu a transcuri lo a cambia pa un modelo 'normal' den sector priva di mancha recurso humano, envez di keda cu e estructura anticua gubernamental? Con por hustifica aumento salarial basa riba aña di servicio, mientras e empresa ta depende di productividad y solvencia financiero? Ta di aprecia cu e empleadonan a yuda carga e cruz di e suspension, y e medidanan cu a bin cu esey, y cu ta logico cu nan ta haya nan salario back, pero manteniendo e sistema anticua di evalua y valora trabao ta un señal cu tin cos pa drecha ainda. Ademas, gobernacion mes ta cambiando, asinan nan ta bisa, pa un sistema moderno di evaluacion di trabao basa riba prestacion, anto e empresa estatal ta mantene e sistema obsoleto ey?

Fuera di esaki, nos no ta enteramente impresionacion cu e anuncio di salida di e suspension di pago, den e sentido cu ainda no a logra tur medida di cobranza cu mester pone e empresa riba un ruta di berdadero solvencia financiero. Esey ta requeri medida mas drastico pa percura cu tur usuario ta paga pa e servicio cu nan ta ricibi, loke te awe no ta e caso. Di un momento pa otro por sucede atrobe cu e empresa mester di ayudo financiero di gobierno, loke tabata e caso tur aña desde su nacimiento, te awe. Cuidao cu unavez e supervision imponi pa poder hudicial no t'ey mas, ta surgi e maneho bieu, cu tur su consecuencianan.

Tambe e mandatario a anuncia cu e ta spera cu Serlimar por bay back den procesamento di desperdicio, banda di e tarea unico actual di recoge esey so. Esaki ta parce nos un sueño remoto, pasobra financiamiento di e tarea aki ta dificil, manera e mandatario mes a bisa. Sin embargo, tin un otro tarea cu ta parce di keda benta un banda: desde cu Parkietenbos a cera, ta aparece mas dump di sushi tur caminda. Nos ta bisa mas, pasobra hopi di nan semper tabat'ey. No ta mihor cuminsa traha riba esey pa caba? Si toch ta e ministro ta manda, cuminsa cu coregi e eror ey...

ExperienceOranjestad, un pagina web nobo pa promove nos centro di Oranjestad



Durante e desvelo di Plaza Comercia ubica na Columbusstraat, 20 di februari ultimo, a intro-

duci un “tool” nobo cu lo fungi como un plataforma pa promove Oranjestad como e “next best place” pa experiencia aki na Aruba, pa asina informa tur interesado kico tur loke Oranjestad tin di ofrece.

Via di un QR Code graba ariba e plakkaat na Plaza Comercio, por haya mas informacion di e.o. e nominadonan honra ariba e plaza aki. Esaki ta e prome paso pa yega na un plataforma cu lo mester promove tur actividad, negoshi, y duna un splicacion amplio di areanan y edificionan iconico y historico di nos centro di ciudad. Proximo paso ta pa colecta y centralisa

tur informacion pa asina publica esakinan virtualmente pa tur cu ta interesa den bishita y conoce mas di nos centro di ciudad.

Sector priva lo haya presencia significativo pa por promove nan producto, of servicio manera cu nos ta custumbra di centro comercialnan rond mundo. E prome paso a wordo tuma y den e lunanan dilanti hunto cu tur comerciante den Oranjestad lo percura pa e website haya su contenido y presencia pa asina yuda promove Oranjestad comercialmente.

Nos tin cu crea otro areanan di recreo y asina diversifica



producto Aruba“ Si nos sincronisa inversion y esfuersonan priva y publico nos ta eleva e potencial comercial di Oranjestad”. Oranjestad ta duna nos un oportunidad unico pa desaroya un area cu pa años ta pasando den de-

safianan comercial. Alabes, e ta duna nos un oportunidad nobo pa crea desaroyo mas den harmonia cu nos calidad di bida como ciudadano, medio ambiente, y nos bishitan-tenan cu ta representa e pilar economico di nos Pais.

Minister Ursell Arends ta presenta plan di alivio pa e holo di Parkietenbos

Un holo desagradabel a plama riba Aruba siman pasa na momento cu biento a cay. A pesar di cu a cera dump mas cu un año pasa, ainda esaki tur dia ta produci un holo repulsivo.

E siman aki e holo di dump a lanta den memoria di habitantenan di Parkietenbos recuerdo di loke nan mester a soporta den tur e añanan prome cu a cera dump na 2022. Pero e problema di holo di dump ta bon conoci cerca Minister Arends di Naturalesa. E problema di holo ta solamente un di e varios proyectonan cu mester completa den e proceso di sanea dump. Esaki ta e proximo

riba lista. Den fin di siman e minister a duna un bista riba e plan cu tin pa reduci y elimina e holo cu dump ainda ta produci. “Prome nos mester a paga e candela grandi y stop sushi di subi dump. Esey a logra. Awo cu nos tin control di e superficie y e tereno nos por ataca e holo,” ta loke Minister Arends a declara den fin di siman.

“E sushi ta produci diferente tipo di gas y den subsuelo tin candela bou di e capa di tera. Tin 70 año di sushi cu ta kimando lentamente bou tera y ta produci huma y un holo malo. Awe ta mas cu un año cu no por tira sushi eyriba pa

kima. Ta mas cu 12 luna sin cu tin candela grandi riba e tereno. Pero nos a keda cu un cero di sushi y awo nos mester atende cu esey,” minister Arends a splica.

“Nos tin un heat scan di e tereno completo. Asina nos a localisa unda tin foco di candela den subsuelo. Mayoría di kimamento ta den e parti noord-central di e tereno. E descomposicion biologico y kimico cu ta sosode den e subsuelo ta produci di diferente tipo di gas peligroso cu alabes ta keda fuel e smouldering,” minister a remarca.

Ministerio di Naturalesa ta trahando cu expertonan in-



ternacional riba e strategia con ta paga e candela ey. Candela den subsuelo no ta facil pa paga. Pero no ta imposible y tin diferente forma con pa haci'e. Minister Arends a percura pa pone fondo den presupuesto pa cubri esaki tambe. Awor cu presupuesto ta cla cosnan por cuminsa move. Den prome mita di e año aki Ministerio di Naturalesa lo hiba un campaña informativo pa asina tur hende por ta na altura di loke a haci caba y kico mas tin di haci.

Ceramento di dump tabata solamente un prome paso pa e futuro di Parkietenbos.

Minister di Naturalesa personalmente a haci un recorido den e bario y a bishita tanto e dump di Parkietenbos como e tereno na Sero Teishi. A keda claramente constata cu ta e holo di e kimamento lento bou suelo di dump pero sin candela, ta loke ta baha riba Parkietenbos y Bucutiweg.

Durante conferencia di OCTA na Bruselas

Prome Minister lo acepta presidencia di OCTA pa 2024

Prome Minister Evelyn Wever-Croes ta na Bruselas pa atende un conferencia di ‘Overseas Countries and Territories Association (OCTA) cu ta tuma lugu dia 26 pa 29 di februari 2024. Aruba lo ta presente cu un delegacion cu ta consisti di Prome Minister, Minister Geoffrey Wever, Director di Departamento di Asuntonan Economico, señora Maria Dijkhoff-Pita y tambe Minister Plenipotenciario di Aruba na Den Haag, señor Ady Thijsen.

OCTA ta un asociacion di paisnan ‘overseas’-otro banda di lama, di Union Europeo cu ta consisti di paisnan den Union Europeo y esnan pafo. E asociacion ta consisti di 13 miembro. Miembronan cu ta pertenece na e parti Hulandes, Aruba, Boneiro, Corsou, Saba, Sint-Maarten y Sint-Eustatius. Miembronan di islanan Frances, French Polynesia, Caledonia, Saint-Barts, Saint-Pierre-and-Miquelon, French Southern and Antarctic lands (TAAF), y Wallis and Futuna. Y miembro di Dinamarca, Groenland.

Esaki ta un conferencia ministerial cu ta tuma decisionnan pa henter e OCTA. Prome Minister ta bay acepta e presidencia, liderazgo di OCTA pa e año nos dilanti. Esaki ta un di e momentonan culminante di e conferencia cu pa e mandatario principal di nos pais, ta un gran honor y orguyo.

Prome Minister a remarca cu OCTA ta hopi importante pa Aruba. Door di e membresia di Aruba na e asociacion aki, Aruba a logra haya fondo di Union Europeo pa logra varios proyecto hopi importante

entre otro e facultad nobo, SISSTEM di Univerdad di Aruba y Mobi-Bus. Y e siman aki, Prome Minister y Minister di Asuntonan Economico ta na Bruselas pa firma e acuerdo financiero pa e proyecto e-Government cu e suma di 14 miyon Euro di cua 13.5 miyon ta pa ehecuacion di e proyecto y 0.5 miyon ta pa mancha e proyecto. Minister Geoffrey Wever lo firma e documento financiero como esun autorisa pa haci esaki.

Prome Minister despues di su compromiso na Brussel, ta bay Hulanda pa diferente re-

union entre otro cu Premier Mark Rutte, Secretario di Estado Alexandra van Huffelen, Minister Rob Jetten, y cu Eerste Kamer y Tweede Kamer. Topico principal di e reunionnan ta riba e tema di e fianza di Covid y con pa baha e interes di 6.9%.



Hulanda ta enfrentando un deficit creciente den antibiotica pa mucha y baby

(NLTimes)—Hulanda ta enfrentando un deficit creciente den antibiotica pa muchanan y baby, segun Helen Huijbers, director di e organisacion Stroomz na Eindhoven. Antibioticanan ta indispensable pa trata infeccionnan bacterial manera neumonia y meningitis, y dokter- y farmaceuticonan Hulandes ta luchando pa trata muchanan cu infeccionnan asina.

“Tin deficitnan di medicamento na Hulanda pa basta tempo caba. Pero antibiotica ta un necesidad basico. Casi tur hende mester di esaki na cierto momento di nan vida.



Y cu awo tin un deficit di antibiotica pa mucha y baby...e ora bo ta pensa, con por? Pero e ta e realidad,” Huijbers a bisa. “Hulanda ta depende riba productornan na Asia, y tin un problema cu suministracion eyan.” Strooms ta cubri 29 practica di dokter y centronan di salud den y

rond di Eindhoven. Huijbers ta calcula cu actualmente dokter- y farmaceuticonan na Eindhoven ta gasta aproximadamente un tercer di nan dia ta purba haya antibiotica pa mucha. “Yamando otro: bo tin algo rond? Of discutiendo cu dokter- y mayornan si un otro tipo di


antibiotica por ser uza of prepara,” el a bisa. “Tur esaki ta pone cuidu regular den un desbentaha.”

Dokter- y farmaceuticonan den e pais ta den consultanan cu Zorgverzekeraars Nederland, e asociacion pa seguronan di salud Hulandes, tocante e deficit. Parti di e problema ta cu e gobierno ta laga cumplimiento di medicina den mas di e seguronan, segun Cees Dekkers di e cadena di botica, Onze Service Apotheken. Deficitnan ta aumentando tur aña pasobra seguronan ta cumpra lo mas barata posibel. Esaki ta mantene costonan abao, y tambe e premie di seguro di salud.

Pero tambe nan ta encurasha farmaceuticonan pa mantene lo menos deposito posibel.

“Tur esaki ta haci e cadena vulnerabel. Si algo bay robes na China of India of durante transportacion, e suministracion ta stop,” Dekkers a bisa. “Y si medicina bira mas scars, productornan ta prefera suministra na otro paisnan den Europa pasobra nan ta paga miho. Pa loko ta e deficit den medicina, awo Hulanda ta na e mesun nivel cu paisnan manera Bulgaria, Romania y Grecia. Mi ta calcula cu e deficitnan aki lo ta tres biaha mas abao si nos paga e mesun suma cu nos bisiñanan den Europa.”

Corsou tin meta pa traha mas espacio pa dentistanan no Hulandes



(CuracaoChronicle)—**E Gobierno Curasoleño a dicidi pa modernisa e procedura di admision pa dentistanan educa pafo di Hulanda. E regulacion actual ta bay back na 1934.**

E procedura revisa ta envolbe un comite di examinacion nobo cu tin e autoridad pa duna exencion pa e examen di admision pa odontologia bao cierto condicion. E comite ta evalua si e educacion den exterior y e diploma obteni ta

cumpli cu e rekisitonan especifica y tin un nivel comparable cu un diploma Hulandes.

E comite di examinacion tambe tin e opcion pa conduci un examen, cu e formato modernisa pa inclui un examen practico y teoretico. E modernizacion aki tin e meta pa haci e proced-

Esaki ta haci'e mas facil pa studiantenan alinea nan escogencia di estudio cu e posibilidad di regresa y drenta e mercado laboral despues di completa nan estudio. Ademas, e cambio ta busca pa tratamiento igual entre dokternan, specialistanan medico y dentistanan.

Cientificonan un stap mas cerca di crea antidoto contra veneno di colebra

(TheTelegraph)—**Cientificonan a desaroya un tratamiento cu ta preveni paralisis of morto causa pa e antidoto di e colebranan mas peligroso na mundo, incluyendo e black mamba y king cobra. E logro a ser gaba como e “prome stap” pa crea un antidoto universal pa basta tempo considera como e “Santo Grial” di investigacion di veneno di colebra**

Tur aña, entre 81,000 138,000 hende ta muri for di mordi di colebra na mundo. 400,000 mas ta sufri di heridanan grave, incluyendo amputacion, perdida di bista y blaarnan cu nunca ta cura. Pero opcion pa tratamiento apenas a cambia pa un siglo.

Sin embargo, den un estudio nobo publica siman pasa, cientificonan a revela un solo anticur-

pa humano cu ta proteha contra veneno di varios colebra. Den e estudio, publica den e revista Science Translational Medicine, investigadonan a analisa proteinanan haya den elapidonanun famia di casi 300 colebra venenoso pa identifica toxinan mas comun cu no por muda of cambia.

Nan a enfoca riba un tipo di toxina cu ta presente den tur colebra elapido y ta causa paralisis den victimanan. E ekipo, cual a inclui investigadonan for di Reino Uni y India, a test mas cu 50 biyon diferente anticurpa humano pa haya un cu ta blokia e veneno.

Un di nan, yama 95Mat5, a resalta. Den pruebanan di animal, tur raton cu a ricibi un inyeccion di e anticurpa aki tabata protegi contra paralisis y morto causa

pa veneno for di varios colebra elipado.

E ekipo ta spera cu 95Mat5 por ta e fundeshi di e prome tratamiento anticurpa monoclonal uza contra mordi di colebra. Pasobra cu e lo ta basa riba moleculenan humano, en bes di anticurpanan di cabay, e mester ta “mas safe cu e antidotonan cu tin actual,” segun profesor Casewell, hefe di e Centre for Snakebite Research and Interventions na Liverpool School of Tropical Medicine y co-autor di e rapport.

Asina mes, mientras cu e identificacion di 95Mat5 y e exito den raton ta un momento grandi, e lo tuma mas tempo pa un medicina por ta disponibel. “Nos lo mester evalua seguridad y eficacia di e anticurpa den pruebanan clinico prome cu nos aproba uzo den pashent.

TRABOU DI MANTENCION RIBA LIÑANAN DI DISTRIBUCION
Interupcion di Coriente

En conexion cu trabounan necesario,
coriente lo wordo interumpi:

Diahuebs, 29 di februari 2024
8:00 AM te cu 4:00 PM

Den vecindario di:

- Ayo
- Sjabururi (un parti)
- Cashero (un parti)
- Santa Cruz (un parti)
- Matividiri
- Santa Lucia (un parti)
- Rooi Prikichi (un parti)
- Zumbo
- Siribana (un parti)
- Seroe Padua
- Seroe Pita (un parti)

N.V. ELMAR ta pidi disculpa pa e inconveniencia cu e interupcion di coriente aki por causa.

Bishita www.elmar.aw pa mira e lista di adresnan afecta.

Danki pa e comprension.

Azeta mira na costa oost di Bonaire por a bin di Tobago

(Reuters) - Mancha di azeta posiblemente biniendo for di bisiña Tobago a alcanza e isla di Bonaire, segun medionan local a bisa ayera, impulsando autoridadnan pa cuminsa organisa proteccion di beach y areanan di mangel.

Desde cu un derame di petroleo di un barco cu a kenter a keda mira pa wardacosta di Trinidad & Tobago dia 7 di februari, el a mancha di preto e beachnan di e nacion Caribense, y ta menasando otro paisnan incluyendo Bonaire, cual su fuente principal di entrada ta turismo.



Parti di costa oost di Bonaire, cerca di Sorobon, ta contam-

ina cu petroleo, segun corant, radio y websitenan local, cu a describi "slabnan diki di tera

preto flotando den lama, di cual hopi a subi riba beach."

Postnan di residentenan di Bonaire y un stacion di radio riba rednan social a muestra potret di santo y rif mancha, y na algun beach, parhanan tur mancha di preto. "Nos ta spera cu e azeta ta bay continua subi Bonaire durante proximo dos dia," Harbor Master di Bonaire, Gunter Flanegin a bisa reporteronan local ayera, agregando cu ainda no a haya e petroleo na henter costa oost.

Un incidente similar cu un derame di petroleo biniendo for di Trinidad a sucede na

2017. Un leak di fuel oil residual for di un tanki di almacenaje na un refineria opera pa compania estatal di Trinidad, Petrotrin, a derama como 20mil galon, cual tambe a alcanza e islanan Los Roques y Isla de Aves di Venezuela.

Gobierno Boneriano no a duna comentario inmediato. Bonaire no a declara un emergencia pa motibo di e contaminacion, pero oficialnan di autoridad di parke nacional di e isla a bisa cu nan por tin mester pa protege e area di mangel na Lac Bay.

Potret di LoopNews.

Rapport ta haya cu gobierno Hulandes a faya pueblo

(NLTimes) - Institucionnan gubernamental tabata ciego pa hendenan y ley, destruyendo ciudadanonan den nan persecucion pa hendenan cometiendo fraude. E Gabinete y parlamento a faya residentenan Hulandes, e organisacionnan manera Belastingdienst a actua fuera di ley y e hudiciario no a ofrece ningun proteccion. Esaki ta loke e comite parlamentario a conclui den su investigacion tocante gobierno su politica di fraude.

E clima politico a bira asina dificil cu e persecucion di fraude aki a continua pa añanan largo sin ser mira, e comite a bisa.

"Den un clima social y politico cu a bira duro, 3 poder di e estado tabata ciego na tanto e hendenan como ley, causando e destruccion di bidanan," e reportahe a nota, cu referencia na e brasanan ehecutivo, legislativo y hudiciario di gobierno. "E ta doloroso cu e sistema di siguridad social y beneficio cu tabatin e funcion di sostene pueblo a destrui e mesun pueblo aki."

E reportahe ta pinta un clima politico den cual casi tur agencia y organizacion cu tin contact oc u ciudadano a causa di beneficiaran y zaakgeld a comete eror tras eror. Politiconan a crea mal leyman y a fracasa den mehora esaki. Organizacionnan di implementacion manera Belastingdienst inhumamente a acusa ciudadanonan di fraude pa añanan largo. E hudiciario a



mantene reglanan cu tabata demasiado estricto pa demasiado tempo y ciudadanonan no a ricibi un chens pa defende nan mes contra e inhumancia cometi contra nan.

E comite a menciona e ley di año 2005 pa bijstand di cuido, pa muchanan y pa vivienda, cual ta cubri mas o menos 8 miyon persona cu bijstand mensual como un ehempel. Segun e comite, gobierno a haci un "acumulacion di mal decision" den e ley aki, algun cual no a ser rectificá casi 20 año despues.

A causa di su tamaño grandi, e ley no ta presta suficiente atencion na proteha e ciudadanonan. Belastingdienst

a keda encarga di e implementacion, un autoridad cu ta custuma di colecta placa no paga esaki y ken su sistema di IT no por a handle e sistema di bijstand en general. Belastingdienst a usa pagonan avansa, cual ta nifica cu e ciudadanonan mester a calcula nan mesun ingreso sin cu nan tabata sa exactamente kico ta conta bao "ingreso". Tampoco no tabatin e posibilidad di desvia for di e reglanan aki y no tabatin claridad tampoco riba kico exactamente un ciudadano mester haci pa paga back loke el a ricibi.

Como resultado di esaki, hende a perde henter nan bijstand pa e eror mas minimo, manera un number fout den

e fecha di nacemento di un yiu. "Esaki a causa un metodo di 'all or nothing' cual a destrui e bida di hende," e comite a conclui.

Un ley manera esaki por causa un "cadena di consecuencia pa hende" a causa di tur tipo di eror, e comite a splica. Y e personanan kendenan ta sufrir e daño ta e personanan mas vulnerabel den sociedad, esnan cu tin mester di e bijstand y vivendanan di ingreso abao ta ricibi e golpi mas fuerte ora cu nan mester paga esaki back.

Durante e ultimo añanan, tabatin varios indicacion cu e legislacion y regulacionnan den e area aki no tabata ad-

ecua segun e comite. Consejo di Estado, Asociacion di Municipalidadnan Hulandes y Ombudsman Nacional tur a señala na esaki. Sin embargo gobierno "no a tuma e problema aki na serio y cambio e ley fundamentalmente," e comite a splica.

E hudiciario tambe a fracasa, segun e comite. Consejo di Estado, Holanda su corte administrativo mas halto, a aproba e metodo aki pa añanan a pesar di ta al tanto di su "consecuencianan desastroso." Parlamento tampoco no a haci nada. "E mayoria di parlamento a fracasa den su tarea legislativo y di supervision," e comite a critica. Tweede Kamer a aproba e gabinete su "mal leyman" y a faya den coregi e erornan. Esaki ta haci Tweede Kamer parcialmente responsabel pa e victimanan su miseria.

E investigacion parlamentario ta e instrument investigativo mas fuerte disponibel pa parlamento. Esaki ta sigui un investigacion anterior tocante e scandal di bijstand den cual Belastingdienst inhumamente a acusa miles di mayor di fraude cu e bijstand pa mucha y a duna ordo pa nan paga back loke nan a ricibi. Varios a ser laga den ruina financiero y miles di mucha a ser saca for di nan hogar a causa di esaki. Den año 2021, e investigadornan a conclui cu gobierno a haci un cantidad grandi di inhumancia na e mayornan aki, cual a causa e collapse di e gabinete Rutte III.

AWAWE

MINI MEGA MEGA PLUS

Awo cu 2 florin mas, bo por gana e

*** Afl. 925.000,-**

*** Afl. 650.000,- + Afl. 275.000,- extra**

Benta ta sera 7:30 pm y sorteo ta hunga 7:45 pm

MEGA PLUS

HUNGA AWO

Rey Willem-Alexander lo habri Museo Nacional di Holocaust na Amsterdam dia 10 di maart

(NLTimes)—Rey Willem-Alexander lo habri Museo Nacional di Holocaust na Amsterdam dia 10 di maart binidero. E lo duna un discurso na e sinagoga Portugues den bisindario, y lo tuma un tour di e museo nobo. E rey lo ser compana pa Prome Minister Mark Rutte, Presidente Austriaco Alexander van der Bellen y Presidente Aleman Manuela Schwesig, ken tambe ta plania pa papia. Nan pais ambos a contribui financieramente na e creacion di e museo.

Emile Schrijver, e lider di e Joods Cultureel Kwartier na Amsterdam, a bisa cu e tabata sinti “honra” pa haya sa cu e rey lo papia na e ceremonia di apertura. E museo ta situa den e distrito. “Pa hopi aña, e rey a muestra di ta comprometi na e comunidad Hudiun na Hulanda, y e historia di e



persecucion di e Hudiunan en particular,” segun Schrijver.

E Museo Nacional di Holocaust lo ser situa den e Reformed Teacher Training

College, cerca di e Hollandsche Schouwburg riba Plantage Middenlaan. E museo lo presenta storianan y informacion tocante e historia di e persecucion di Hudiunan na Hulanda. E museo lo ex-

hibi 2,500 obheto, potret- y peliculanan redescubri, grabacionnan, documentonan y instalacionnan.

E Hollandsche Schouwburg a ser uza pa reuni Hudiunan

durante e Segunda Guerra Mundial prome cu mandanan pa camponan di concentracion. “Den zomer di 1943, muchanan Hudiun for di e centro di tra’i merdia na banda a ser hiba na e College y despues movi na luganan pa sconde. Casi 600 mucha a ser salba di e manera aki,” segun e Joods Cultureel Kwartier.

“E Museo Nacional di Holocaust lo conta e storia di e persecucion di e Hudiunan na Hulanda. Entre 1940 y 1945, riba e ordennan di e autoridadnan Aleman, Hudiunan na Hulanda como tambe otro, incluyendo Roma y Sinti, tabata experencia discriminacion sistematicamente, tabata ser persigui, deporta y asesina,” e organizacion a skirbi den un comunicado. “Aproximadamente 102,000 Hudiun Hulandes a muri durante e Segunda Guerra Mundial.”

Lider di banco central Hulandes ta adverti di e impacto di tension global riba comercio

(NLTimes)—Un aumento den tension geopolitico y restriccionnan riba comercio entre bloke- y paisnan economico rond mundo tin un efecto negativo riba comercio liber y inversion. Klaas Knot, presidente di De Nederlandsche Bank (DNB), a adverti di esaki den un discurso na e think tank di Eurofi na Ghent diabierna pasa. P’esey politiconan Europeo mester traha pa proteha comercio liber y sigui fortalece e mercado Europeo, segun Knot.

Durante e ultimo cinco añanan, menasanan riba comercio liber y inversion a aumenta y resistencia na globalisacion tambe a crece, Knot a bisa.

“Cooperacion internacional ta bayendo atras. Brexit, tensionnan andante entre Merca y China, e invasion Ruso di Ucrania y e conflicto den Medio Oeste a pone mas presion riba globalisacion,” Knot a splica.

Como respuesta riba e desaroyonan aki, pais- y blokenan economico ta sigui persigui tras di politicanan cu tin e meta pa ta menos dependiente di otro y proteha nan mes for di desaroyonan in-faborabel den otro parti di mundo. Mientras cu fortaleciendo seguridad nacional y mitiga riesgonan economico ta un “politica logico” den un mundo cu a bira mas peligroso, e costonan economico di e politicanan aki por ta

hopi halto si no implementanan bon, segun e presidente di DNB.

En berdad economianan ta mucha mas interdependiente awo compara cu algun decada atras, pues e costonan di fragmentacion ta hopi mas halto. “Comercio-pa-GDP global awo ta na 60% compara cu 24% durante e Guerra Friu. Esey ta bisa nos cu e bi-aha aki e posibel costonan di fragmentacion ta hopi mas halto,” Knot a bisa den su discurso.

E fragmentacion di economianan den e forma di aumenta restriccion riba comercio ta resulta den prijsnan di importacion mas halto y menos acceso na tecnologia y cono-

cemento, segun Knot. Tensionnan politico internacional tambe ta haci inflacion menos predicibel.

Ademas, un mundo mas diviso tin implicacion pa estabilidad financiero. Durante e

crisis financiero di 2008, legisladonan rond mundo por a responde lihe, danki na e bon relacionnan cu a desaroya durante años. Den un mundo fragmenta, un contesta lihe ta bira mas complica, Knot a enfatisa.



20 region di Peru den emergencia sanitario pa casonan di dengue

(Infobae) – Aumento di casonan di dengue na Peru y fayecidonan debi na malesa aki cu ta suma 28 den siman aki, finalmente a motiva e Ministerio di Salud pa tuma e decision di declara den emergencia sanitario algun region di Peru.

Maske e influencia halto di e malesa aki ya caba tabata conoci na regionnan di nort manera La Libertad, Piura, Áncash, e titular di e sector, Cesar Vasquez, a indica cu 20 di e 24 region di Peru ta inclui den un proximo declaracion di emergencia sanitario cu tabata cabando di redacta ayera



na Presidencia di Consejo di Ministernan y cu por ser publica den proximo dianan. “Ta trahando pa cu den

proximo oranan of dianan lo sali un decreto supremo declarando emergencia den e mayor parti di e regionnan

di e pais pa riesgo inminente di e epidemia aki, 20 region ta considera den emergencia sanitario,” e titular di Ministerio di Salud, Cesar Vasquez a bisa.

Segun, e declaracion di emergencia ta bay inclui e siguiente regionnan: Amazonas, Áncash, Ayacucho, Cajamarca, Cusco, Huánuco, Ica, Junín, La Libertad, Lambayeque, Lima, Loreto, Madre de Dios, Pasco, Piura, Puno, San Martín, Tumbes, Ucayali y Callao.

Den e grupo di region aki, segun Vasquez a señala, ta den peliger grave pa motibo cu a surpasa e cantidad di casonan

cu ta presentando den teritorionan aki.

Pa loko ta trata e cifranan di mortalidad, Vasquez a sostene cu maske Peru ta presenta cifranan halto pa e malesa aki, te ainda no a yega na nivelnan di Brazil of Argentina.

E casonan confirma di dengue te awor a supera e cifranan di aña pasa durante e mesun periodo te februari. Vasquez a sigura cu na e momentonan aki “nos tin 24.981 caso acumula y 28 fayecido. Aña pasa nos tabatin 12.624 caso confirma y 18 fayecido. Ta un aumento di 95% te e fecha aki, nos a duplica e casonan,” el a bisa.

Mas di 10.000 persona deteni na Ecuador desde comienso di lucha contra narcotrafico

(Infobae) – Mas di 10.000 detencion di personanan a ser registra na Ecuador den ultimo 48 dia di “conflicto arma interno” cu presidente Daniel Noboa a declara na cuminsamento di januari contra crimen organisa, den cual e gruponan, dedica principalmente na narcotrafico, ta ser considera como terorgananan.

E number di detenidonan a yega na 10.134 den e ultimo rapport publica diadomingo pa Gobierno di Ecuador, den cual 268 di esnan cu a ser captura ta acusa di “terrorismo,” mientras cu e mesun rapport

ta señala cu a confisca mas di 64 ton di droga.

Te awor forsanan di seguridad a ehecuta 126.436 operacion conhunto (mas di 2.600 pa dia), 171 di nan contra gruponan criminal denomina awor pa autoridannan como gruponan terrorista.

Ademas, a confisca 3.040 arma di candela, cerca di 20.000 explosivo, mas di 214.000 bala, 1.353 cargador di bala y casi 4.200 arma blanco.

Durante estado di excepcion forsanan di orden a mata nuebe persona califica como terorgananan; tres miembro di Polis a fayece y te ainda no a registra ni un fayecido di par-

ti di ehercito.

Agentenan tambe a confisca na delincuencia 979 auto, 1.147 brommer y 28 boto, entre nan, un submarino pa transporta droga; ademas di 253.000 dollar cash.

Den estadisticonan, ta mantene e cifra di 34 detenido re-captura, di casi 90 cu a huy for di prison na unda na comienso di aña, a sucede varios enfrentamento di detenidonan cu 200 rehen entre guardianan y polisnan cu a logra keda den libertad.

Despues di a declara “conflicto arma interno,” Gobierno di presidente Daniel Noboa



a identifica por lo menos 22 grupo di crimen organisa transnacional y a ubica nan “como organizacionnan terrorista” y “actornan no estatal combatiente”

Ora ta señala e gruponan aki como combatiente, e mandatario a habri un porta legal pa cu Forsa Arma hunto cu Polis por actua cu tur nan recursonan pa neutralisa nan.

Frontera sur di Mexico ta sintiendo cu exodo Venezolano ta birando pio

(EFE) – Frontera sur di Mexico ta sintiendo cu exodo di Venezolanonan ta birando pio, despues

di un aumento di 131,8% di migracion iregular na e pais aki na 2023 y hasta casi 223.000 persona, mas

di e cuarta parti total di e migrantenan detecta pa Gobierno Mexicano.

Venezuela ta e pais principal di origen di e migrantenan indocumenta cu a ser detecta na 2023 pa Instituto Nacional di Migracion (INM) cu a reporta un aumento anual di mas di 77% di e migracion iregular ora a supera mas di 782.000 persona.

Ademas, Venezolanonan ta e di seis nacionalidad cu mas solicitud na Comision Mexicano di Ayudo na refugiadonan (Comar), cu casi 5.500 peticion e aña pasa. E yegada di Venezolanonan ta

ser sinti cu un forsa particular na Tapachula, frontera di Mexico cu Centro America, na unda Centro di Dignificacion Humano (CDH) ta adverti cu e cifra di migrantenan di e origen aki lo por a supera 300.000, pa motibo cu Gobierno ta conta esnan intercepta so.

Na frontera sur, na Ciudad Hidalgo, ta mantene un campamento di entre 500 pa 1.000 Venezolano cu tentnan unda nan ta warda pa haya atencion di autoridannan Mexicano.

Ta un crisis cu no ta caba, ya cu segun activistanan e migrantenan ta yega na Mexico

pa via di e crisis economico pa problemanan politico, falta di cuminda y necesidad di empleo.

E situacion ta birando mas grave mientras Venezuela ta prepara pa eleccion e aña aki, den cual Nicolas Maduro a inhabilita Maria Corina Machado, e principal opositor, maske el a priminti otro cos den dialogo cu oposicion. Aunke e presidente Mexicano, Andres Lopez Obrador, a muestra un discurso di acogida, e migrantenan Venezolano ta denuncia e violencia di crimen organisa y discriminacion di Gobierno.



Jamaica: Merca ta elogia e partnership di seguridad “fuerte” cu Jamaica

(JamaicaObserver) - E partnership di seguridad entre Jamaica y Merca ta wordo describi como uno fuerte pa un di e oficialnan di Gobierno di Merca.

Na mesun momento, teniendo na cuenta e persistencia di traficantenan di droga, arma, y hende, Subsecretario di Seguridad Civil, Democracia, y Derechonan Humano di Merca, Uzra Zeya, ta bisa cu ambos estado no por relaha nan esfuersonan pa combati actividadnan ilegal.

“Nos tin un cooperacion fuerte, pero e magnitud di e problema ta asina grandi cu nos no por keda pasivo, nos mester intensific’e” Subsecretario Zeya a bisa na Jamaica Observer siman pasa durante su bishita di trabou na e isla.

Repitiendo cu tanto Merca como Jamaica tin un compromiso pa segura e seguridad di nan ciudadanonan, Zeya a bisa cu el a topa “determinacion fuerte riba e importancia di berdad di nos cooperacion riba e asunto” durante reunionnan cu e Prome Minister Andrew Holness y su



Gabinete, como tambe cu Lider di Oposicion Mark Golding.

“E ta un partnership fuerte y e ta profundisando ainda mas. Tambe e ta un partnership di henter gobernacion y nos ta hopi orguyoso di sostene esfuersonan pa desaroya e capacidad di e polisnan di Jamaica pa lucha contra trafico di droga, trafico di arma, trafico di persona,” Zeya a bisa durante un entrevista

cortico durante su inauguracion, hunto cu Comisario di Polis Mayor General Antony Anderson, di e di 10 espacio amigabel pa mucha victima di crimen na Jamaica.

E espacionan amigabel pa mucha a wordo establece bao di un partnership envolviendo e Gobierno di Merca, Ministerio di Seguridad Nacional, y e Forsa di Polis di Jamaica (JCF) cu a cuminsa na 2018. Nan ta diseña pa

yuda muchanan cu ta victima di crimen sinti nan mes sigur durante nan interaccion cu profesionalnan, incluyendo oficialnan di ley, trahado social, profesionalnan di cuida di salud y fiscalnan.

JCF a splica cu e espacionan ta brinda conseho, sosten emocional, intervencion di crisis, preparacion pa corte, y abocacion pa victimanan di crimen, incluyendo trafico di hende.

Ademas, nan ta ofrece actividadnan cu ta promove sanacion, resistencia y interaccion positivo.

“Pa medio di hunga, arte, y conseho, muchanan por expresa nan sentimentonan y haya consuelo. Personal getrain den e espacionan aki ta ofrece sosten personalisa y ta yuda muchanan recupera nan balor propio, manera tambe pa enfrenta trauma,” JCF a bisa den un comunicado di prensa.

Riba e cuestion di arma ilegal cu ta wordo manda pa Jamaica for di Merca, Subsecretario Zeya, ora a wordo pidi pa responde na yamadanan pa Washington pa haci mas pa para e fluho, a bisa cu tin un necesidad cla pa un respuesta di multi-direccion.

“Nos ta reconoce cu tin un papel critico sumamente importante pa hunga y Presidente Joe Biden y Vice-Presidente Kamala Harris realmente a priorisa pa eleva e lucha contra trafico di arma den henter Caribe,” Zeya a bisa.

Puerto Rico: Cu un marcha riba 8 di maart, Coalicion 8M ta busca pa resalta e poder politico di hende muhe

(ElNuevoDia) - Cu enfasis ariba e importancia di e voto di hende muhe durante e eleccionnan di e aña aki, y den conmemoracion di e mas di 50 aña di e prome manifestacion na Puerto Rico riba e Dia Internacional di Hende Muhe, e Coalicion 8M a convoca diadomingo un marcha cu ta bay tuma lugar dia 8 di maart, sa-

liendo for di e Oficina de la Procuradora de la Mujer (OPM) te na e Comision Estatal de Elecciones (CEE).

E Coalicion 8 de Marzo (8M) a scoge e ruta di OPM te na CEE pasobra e ta simbolisa e afirmacion di e poder politico di hende muhe, e grupo a subraya, cu ta consisti di alrededor di 50 organisacion.

Ademas e organisacion, durante un conferencia di prensa, a bisa cu e actividad ta bay sirbi pa conmemora e prome protesta na Puerto Rico pa e Dia Internacional di Hende Muhe, cu a tuma lugar na 1974 y cu a wordo organisa pa e grupo feminista Mujer Integrate Ahora (MIA), fundada na 1972.

“For di e momento ey, e marcha aki a wordo celebra sin interrupcion na Puerto Rico. MIA tabata lucha pa igualdad - di salario, educacion, derechonan - como tambe pa e autonomia y emancipacion sexual y reproductivo di hende muhe. Nan tabata pioneronan den e lucha pa legalidad di aborto y pa despenalisa prostitucion,” Alice Perez Fernandez, vocero di Coalicion 8M a bisa.

“Nos ta kere ta importante pa recupera e historia di e eventonan aki y nan legado pasobra e lucha di e hende muhe di e tempo ey ta sigui ta significativo awendia,” el a apunta.

Tocante e conmemoracion di e proximo 8 di maart, Angelica Acosta Bueno, otro vocero di e entidad, a opina cu esaki ta necesario pa “por genera e cambionan den politica publico y di prevencion necesario pa detene e cifranan creciente di feminici-

dio y violencia contra hende muhe, nos mester, entre otro, educacion cu perspectiva di genero y personanan den gobierno cu ta comprometi den atende efectivamente e problema aki.”

Acosta Bueno a sostene cu, for di e perspectiva di derechonan humano di hende muhe, e institucionnan gubernamental tin e deber di protege y garantisa e seguridad y bida. “Nos ta demanda pa e institucionnan aki cumpli cu nan deber, pasobra actualmente nan no ta haci’e,” el a bisa.

E vocero a recorda cu, te cu aworaki den aña 2024, a registra 19 feminicidio, segun e datonan di e Observatorio de Equidad de Genero. “Cada un di e bidanan aki cu ta bay perdi pa motibo di violencia di genero ta demostra e falta di compromiso y e incapacidad di e gobierno actual,” el a señalá.



Don Henley di Eagles confronta tocante incidente unda hoben di 16 aña a sufri sobredosis na su cas

(AP) – Don Henley a ser confronta na Corte di New York dialuna tocante un incidente cu a pasa den pasado; su aresto den aña 1980 despues cu segun autoridadnan nan a haya droga y un hoben di 16 aña sunu sufriendo un sobredosis na su cas di Los Angeles.



Henley tabata testiguando na un huicio criminal tocante loke fiscalnan ta bisa ta e robo di letranan skirbi na man di “Hotel California” y otro hitnan di Eagles di parti di dealernan cu ta bende articulonnan coleccionabel. Sinembargo un fiscal a puntra e cantante y drummer tocante e aresto cu a tuma lugha, aparentemente pa adelanta na e abogadonan di defensa kendenan anteriormente a indica cu nan tabatin plan di cuestiona e integrante tocante su memoria di e era aki y su estilo di bida durante e tempo aki.

E aresto ser brevemente re-

porta na e momento y a genera un mencion chikito den e movimiento recien di #MeToo, ora cu varios di e incidentenan tratando figuranan publico a keda re-examina. Riba dialuna, Henley a conta corte cu el a yama pidi un empleado sexual e anochi ey pa motibo cu e “tabata kier scapa for di e depresion cu e tabata aden” a causa di e ruptura di e banda. “Mi tabata kier lubida di tur cos cu tabata pasando cu e banda y mi a tuma un decision cu mi ta

repenti di a tuma te cu awe. Mi a biba cu esaki pa 44 aña y te ainda mi ta biba cune, den e corte aki, un mal decision,” Henley a testigua.

Di mesun manera cu un entrevista di aña 1991 cu GQ, Henley a testigua cu e no tabata sa di e mucha su edad te despues di e aresto y cu el a drumi riba cama pero nunca a tin relacion sexual. “Mi no ta corda e detayenan anatomico, pero mi sa si cu no tabatin relacion sexual,” Henley



a declara, ken a bisa cu nan a usa cocaina hunto y a papia pa varios ora tocante e banda su ruptura y e hoben su separacion for di su famia.

El a bisa cu el a yama bomberonan, kendenan a revisa e hoben su salud y a bisa cu e ta bon y a bay despues cu el a priminti cu e lo cuida di e ho-

ben. E paramediconan, kendenan a haya e hoben sunu, a yama autoridadnan. Henley a bisa tambe cu e mucha muhe a recupera y tabata preparando pa bay cu un amistad cu el a pone Henley yama ora cu polis a yega oranan despues. Na e momento, autoridadnan a haya cocaina, quaaludes y marihuana na su cas.

Edad pa mira Mary Poppins cambia na Reino Uni a causa di “lenguahe discriminatorio”



(TMZ) – **Mary Poppins** lo ricibi un look fresco den aña 2024 cu aumento di e edad permiti pa mira e pelicula pa motibo cu esaki tin lenguahe discriminatorio, cual no ta apropiada pa tur audiencia.

Mientras cu probablemente a yega di mira e termino ofensivo den e pelicula, British Board of Film Classification, comunmente referi como BBFC, ta senalando e pelicula pa e uso di e termino “Hot-

tentots,” mirando cu esaki no ta apto pa menornan.

E por parce un termino sin significado pa personanan den otro parti di mundo, sinembargo e termino aki tin historia den Britania. E ta un frase usa cu ta considera sumamente ofensivo pa motibo cu esaki tabata usa pa colonisadornan Europeo na Africa, especificamente Khoikhoi, un grupo indigena di Africa. E termino Hottentots a bini como un imitacion di

e grupo su idioma, cual tabatin click y awendia e palabra racialmente carga no ta usa mas, sinembargo e ta ser usa den Mary Poppins.

Durante un di e momentonan iconico di e pelicula di Disney stima, unda Dick van Dyke ta cuminsa interpreta “Step in Time” ora cu tur e hombernan tin sushi preto ta cubri nan cara, especificamente ora Bert y e grupo ta cuminsa baila riba e dak, e bisina excentrico Admiral



Boom ta declara “nos ta bao atake di ‘Hottentots.’”

Admiral Bloom tambe ta bisa e termino na comienso di e pelicula ora cu e ta puntra e yiunan di e famia Banks si nan ta bay “lucha contra e Hottentots.” E pelicula aki a sali den aña 1960, cual ta haci cu e tabata den temponan

diferente.

E cambio den e edad permiti pa mira e pelicula lo yuda mayornan preocupado di expone nan yiu na e “comportamento y lenguahe discriminatorio,” cual por ser ripiti hasta sin e intencion di haci esaki. El a bay di Rated-G pa Rated-PG.

Healthy Lifestyle Center a celebra su prome aniversario

Diasabra atardi Minister di Turismo y Salu Publico tabatin e honor di celebra conhuntamente cu e famia di Healthy Lifestyle Center (HLC) e prome aniversario di Healthy Lifestyle Center Aruba.

Healthy Lifestyle Center a inicia oficialmente dia 23 di februari 2023. E meta principal di HLC ta pa brinda e pueblo di Aruba e guia profesional pa cu nan nutricion y movencion, specialmente esnan na riesgo pa haya complicacion di salud, door di hiba un bida no saludabel. E meta ta pa guia e participante pa adapta su bida pa uno mas saludabel.

Un di e programanan mas importante di HLC ta pa ofrece servicionan di guia di nutricion y movencion riba un forma personalisa y cu ta adapta na e bida di e cliente specifico. E programa personalisa aki tin un duracion di 3 luna den cual e cliente ta haya su citanan semanalmente cu un dietista den cual e guia con pa yega na un bida mas saludabel ta sosode.

Desde inicio HLC a haya un acogida masha grandi mes di e pueblo di Aruba. Actualmente HLC ta conta cu un total di 293 cliente activo. Durante e aña aki HLC a logra cu clientenan a baha un total di 433kg conhuntamente. Banda di guia personal HLC tambe ta ofrece otro programanan manera curso na scolnan, curso na companianan, chekeo gratis regularmente na pueblo, ehecucion mensual na unda ful comunidad por participa.

Un programa special cu HLC ta ofrece ta e programa yama "Improving Lives Together". Esaki ta un programa cu tin un duracion di 3 luna den cual un total di 20 cliente ta participa. E programa aki ta ofrece guia di nutricion y movencion intensivo den un forma "community based". Durante e periodo aki e clientenan ta ricibi, banda di consultanan semanalmente na HLC cu e dietistanan, tambe un programa di ehecucion cual ta encera 3 biaha pa siman na un gym na unda nan ta ricibi guia profesional con pa haci movencion na un manera safe y accesibel.

Durante aña 2024 e meta di HLC ta pa amplia su servicionan y bay den organisacionnan pa asina guia tur



esnan na pia di trabao. HLC ta forma parti di e vision di Minister di Salud Publico na unda prevencion ta e enfoque principal di su maneho riba tereno di Salud Publico y cual ta cuadra cu ehecucion di e Plan Nacional Multi-sectoral contra NCDs 2020-2030 cu conhuntamente cu DVG y PAHO, Gobierno di Aruba a firma na aña 2019.

Minister Oduber kier a manda un palabra di gradicimento y felicitacion na e team profesional di HLC, Directie Volksgezondheid, Plataforma di Promocion di Salud y tur esnan cu ta haci HLC un programa exitoso. Un danki tambe na colega Minister Croes pa ofrece HLC e bunita espacio na IBISA pa nan practica.



Un pabien y un danki en especial ta bay pa tur e clientenan di HLC cu a demonstra curashi y determinacion pa

busca y ricibi e guia profesional pa asina haci un cambio di estilo di bida pa uno mas saludabel.

Palo di luz di un mall na Palm Beach a bin abao

Diasabra madruga a drenta informe di cu un palo di luz di un mall na Palm Beach a bin abao hera dal un auto, mesora a dirigi un patruya na e sitio.

Na yegada di e patruya a bin compronde cu aki ta trata di un palo di luz decorativo pa ilumina e mall cual e parti abao lo a putri y no tabata keda firme mas y lo a cay.

Afortunadamente e no a cay riba ningun hende ni auto. Polis a conseha esun encarga pa e revisa e otro palonan di luz y repara esakinan.



Polis a bay Cashero unda un persona tabata den un cura cu no ta di dje y posiblemente arma!

Diabierna anochi a drenta informe di cu tin un persona desconosi den un cura di cas cu no ta di dje y por ta arma y actuando sospechoso mesora a dirigi un patruya na e sitio.

Na yegada di patruya a topa e persona den e cura y bisando cu esey ta su cas. Polis a pidi refuerzo ya cu e ta haciendo comosifuera e ta arma y polis no tabata sa sigur ki intencion e tabata tin. Te hasta su mama

a presenta pa busc'e pero e no kier a bay. Despues di un rato r refuerzo policial a yega y a logra gar'e di sorpresa y a bay cune pa warda di polis.



Polis a detene chauffeur burachi cu a bay cumpra cuminda na un minimarket

Diasabra madruga polisnan atento a nota un auto coriendo malo riba caminda na Kamerlingh Onnesstraat, mesora nan

a par'e y bay atende cune. E chauffeur a bisa cu ta eynan el a bay pa cumpra cuminda y djey regresa su cas. Polis a pone pasa e test di alcohemia

y esaki a resulta malo p'e ora el a surpasa e limite permiti pa ley y nan a detene.

Polis a detene homber burachi cu kier a bringa na Hendrikstraat

Diabierna anochi a drenta informe cu na Hendrikstraat tin un homber burachi haciendo fastioso, mesora a dirigi un patruya na e sitio.

Na yegada di e patruya net e homber burachi kier a bringa tambe. Polis mesora a detene y a pidi e vehiculo di transporte pa hib'e warda di polis.



Truck a lora dilanti brommer motociclista mester a bula for di e brommer pa evita impacto

Diabierna anochi a drenta informe di un accidente dilanti di Riu Palace, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda un truck a bay bira pero no a mira e brommer di direccion contrario y pa evita e fuerte im-

pacto e motociclista a bula for di s brommer cual a bay pega bao di e truck. E motociclista a djis haya un golpi y algun rasca pero nada di gravedad y no tabata desea atencion medico. E motociclista kiermen e no tin mucho tempo cu el a cumpra e brommer y ya e tabata den tramite pa bende pa cumpra un auto.

Chauffeur a baha caminda bay dal riba piedra banda na Cas Ariba

Diasabra madruga a drenta informe di un accidente na Cas Ariba, mesora a dirigi un patruya na e sitio.

Na yegada di e patruya a bin compronde cu aki ta trata di

un accidente unda e chauffeur di un Nissan Sentra a baha caminda y dal riba e piedra band'i caminda. Afortunadamente ningun hende a resulta herida.



Chauffeur di un Nissan Sentra a perde control bay dal 2 auto y un cura di cas kibra y bandona e sitio

Diasabra madruga a drenta informe di un accidente na Macuarima, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda e chauffeur di un Nissan Sentra blauw cla cu a perde control baha caminda bay dal un Toyota Yaris y un Kia stationa manda e Kia destrui un cura di cas. Djey el a core bandona e sitio na careda na pia lagando e auto atras. Polis a confisca e auto pa mas investigacion.



Dama chauffeur na yoramento despues di a accidenta cu auto fia y awor ta den gasto

Diasabra madruga a drenta informe di un accidente riba e caminda di Palm Beach pa Sasaki, mesora a dirigi un patruya na e sitio.

Na yegada di e patruya a bin

compronde cu aki ta trata di un accidente unda cu un auto a cera un otro auto riba caminda y esaki a causa cu un dama cu auto fia a perde control y bay accidenta. Mirando cu awor e ta hay'e cu gasto y

cu e auto cu sla dilanti y na banda e dama tabata na yoramento. Afortunadamente ningun hende a resulta herida.



Durante un control rutinario na un auto sospechoso na Madiki un hoben a core sali bay

Diasabra madruga polisnan patruyando drn Madiki a wak 4 hoben cu capuchon bisti para banda di un Nissan March blauw, mesora polis a bay den nan direcci-

on un di e hobennan a core bay pero e otronan a keda polis a controla nan y a papia cu nan.

Nan a bisa nan ta biba eynan

mes y nan tabata chill y cu nan no sa mes pakico nan amigo a core bay. Despues cu polis no a haya nada iregular den nan poder polis a continua cu nan patruya.

Polis y security a bay Riu Antillas pa un problema den camber

Diasabra madruga a drenta informe di un problema den camber na Riu Antillas, mesora a dirigi un patruya na e

sitio.

Na yegada di e patruya a bin compronde cu aki ta trata di un problema entre un huesped y un bishitante.

Ora polis a papia cu nan niun kier a bisa kico exactamente a sosode pero e bishitante a bisa di ta bay y e huesped a bisa di cu e lo bay drumi.



Autoridadnan di Florida ta aproba prohibicion di rednan social pa mucha bao 16 aña

(AP) – Un proposicion pa crea un di e nacion su prohibicion mas fuerte contra menornan su uso di rednan social ta na caminda pa gobernador republicano di Florida Ron DeSantis, ken a expresa preocupacion tocante e legislacion pa mantene muchanan bao e edad di 16 fuera di plataforman popular sin importa si tin aprobacion di e mayornan of no.



E Cas a aproba e proposicion cu un voto di 108 - 7 diahuebs oranan despues cu e Senado a aproba esaki cu 23 - 14. E Senado a haci cambionan na e proposicion original, cual republicano Paul Renner a bisa cu e ta spera lo atende DeSantis su preguntanan tocante privacidad.

E proposicion ta bay den contra di cualkier plataforma di rednan social cu ta mantene record di actividad di usuario, permiti muchanan publica material y interactua cu otronan y ta usa funcionnan adictivo diseña pa causa uso compulsivo of excesivo. Sostenedor ta señala na e tasa di suicidio entre muchanan, cyberbullying y predadornan cu ta usa rednan social pa yega na victimanan. “Nos ta papiando di negoshinan cu ta haci uso di funcionnan adictivo pa tin un manipulacion en masse di nos muchanan pa

causa nan daño,” e proposicion su sponsor den Senado, Republicano Erin Grall a comenta.

Otro estadonan a considera legislacion similar sin embargo mayoria no a propone un prohibicon total. Na Arkansas, un hues federal a blokia un ley den augustus cu lo rekeri consentimiento di e mayor pa un menor crea un cuenta nobo riba rednan social. Sostenedor na Florida ta spera cu si e proposicion bira un ley, e lo logra mantene contra desafionan legal pa motibo cu esaki lo prohibi rednan social cu ta basa riba funcionnan adictivo manera alerta di notificacion y videonan cu ta cuminsa automaticamente na luga di e contenido di e sitionan aki. Sin embargo e oponentenan ta bisa cu esaki ta den violacion di First Amendment y

cu mester ta den man di mayornan, no gobierno, monitor e uso di rednan social di muchanan.

“Esaki no ta aña 1850. Mientras e mayornan ta presenta na reunionnan di scol pa prohibi bukinan, nan yunan ta na cas riba nan iPad ta mira cosnan malo,” Senador Democratico Jason Pizzo a comenta. El a bisa sarcasticamente cu legisladornan tin otro opcionnan si nan kier cria yiu di otro hende. “Ban tin un proposicion cu ta encurasha pasa tempo cu bo yunan, cushina cuminda, come na mesa cu otro, interactua cu otro, yama wela wak si e ta bon de bes en cuando,” el a comenta. E legislacion tin un mescla di Republicano y Democrata na ambos banda di e problema.

DeSantis a bisa cu e ta com-
pronde cu e plataforman



por ta dañino pa muchanan pero tambe a enfatisa cu e mayornan mester hunga un rol den monitor e uso. “Nos no por bisa cu 100 porciento di e usonan ta malo paso nan no ta,” DeSantis a bisa prome cu e proposicion a keda aproba. “Mi no ta kere cu e ta na e punto ey ainda, pero mi ta spera cu nos por yega na un manera cu ta atende e mayornan su preocupacionnan.”

Sin embargo Renner, ken a haci e problema su prioridad top legislativo, ta pensa cu e gobernador lo aproba e producto final pa motibo cu esaki ta atende su preocupacionnan tocante anonimidad di e usuario.

Algun mayor tambe tin sentimentonan mescla cu esaki.

Angela Perry, un mama di Florida, a bisa cu e ta com-

pronde e logica tras e proposicion y cu su persona y su casa no a laga su yiu subi ningun plataforma te ora cu el a cumpli 15 aña pero tambe ta considera cu ta keda na cada mayor pa tuma e decision aki basa riba e nivel di madurez di nan yiu. “Kico a pasa na e derechonan di mayornan? Perry a comenta. “Ya caba bo ta scoge ki bukinan mi yiu ta lesa na scol. Esaki ta aceptabel te cierto punto, pero awo tambe bo ta drentando nan bida priva. Esaki ta birando algo intruso.”

E proposicion aki lo rekeri pa companianan di rednan social cera cualkier cuenta cu ta kere ta usa pa menornan y pa cancela cuentanan bao peticion di un mayor of menor di edad. Cualkier informacion tocante e cuenta aki mester keda kita.

Google ta bisa cu generador di imagen AI tabata “sobrecompensa” pa diversidad

(AP) – Google a pidi disculpa diabierna pa su lansamento cu defecto di un generador di imagen cu inteligencia artificial, admitiendo cu den cierto caso, e herment tabata “sobrecompensa” den busca un rango diverso di persona hasta ora cu e tipo di rango aki no tabatin sentido.

E splicacion parcial pa dicon e imagennan tabata pone hende di color den scenarionan historico unda nan no lo ser haya normalmente a bini un dia despues cu Google a bisa cu lo temporalmente stop su chatbot Gemini di genera imagen cu persona den dje. Esaki ta den respuesta di critica riba rednan social for

di usarionan cu ta bisa cu e herment tin un preferencia contra hendenan blanco den e manera cu e tabata genera un set di imagen etnicamente diverso den respuesta na instrucionnan skirbi.

“E ta cla cu e funcion aki no a traha adecuadamente,” un publicacion riba diabierna di parti di e vice presidente Prabhakar Raghavan a bisa. “Algun di e imagennan genera no ta corecto y te hasta por ta ofensivo. Nos ta gradici pa e usarionan su feedback y ta pidi disculpa cu e funcion no a funciona corectamente.”

Raghavan no a menciona ehempel specifico pero entre esunnan cu a hala atencion riba rednan social e si-

man aki tabatin imagennan cu tabata muestra un muhe di color scur como un di e figuranan prominente Mericano, e Founding Fathers. Tambe esaki a muestra hendenan Asiatico y di color scur como soldaatnan Aleman di e era Nazi. The Associated Press no por a independientemente verifica ki instrucionnan a ser usa pa genera e imagennan aki.

Google a agrega e funcion aki na su chatbot Gemini, anteriormente conoci como Bard, mas o menos 3 siman atras. El a ser crea riba un experimento di Google anterior yama Imagen 2.

E compania tin tempo caba cu e conocimiento cu e tipo



di hermentnan aki por ta aleatorio. Den un reportahe tecnico di ana 2022, e investigadornan cu a desaroya Imagen a adverti cu hermentnan generativo di AI por ser usa pa plama mal informacion y acoso “ademas di trece dilanti varios preocupacion tocante exclusion cultural y social of preferencia pro of contra di esaki.” E consideracionnan aki a causa cu Google a dicidi di no lansa un “demostracion

publico” di Imagen ni tampoco su codigo base, e investigadornan a agrega e tempo aki. Desde e tempo ey, e presion pa publicamente lansa un producto di generacion AI a crece a causa di e careda competitivo entre companianan di tecnologia purbando di capitalisa riba interes den e tecnologia cu ta surgiendo causa pa OpenAI su chatbot ChatGPT.

Devin Haney y Ryan Garcia ta bay bringa pa un titulo



AP) — Ryan Garcia tabata kier pa su fanaticonan sa cu su pelea pa titulo contra campeón super lightweight Devin Haney ta pertenece riba e escenario mas grandi di boxeo.

“Esaki ta un pelea di MGM Vegas, haciendo tur loke nos por pa trece esaki na Vegas y duna e pelea aki loke e ta merece!!!” el a skirbi dia 23 di februari riba rednan social. Un problema: Oscar de la Hoya, su promotor, ya a anuncia dos dia prome cu e evento ta bayendo Brooklyn. Pues talbes e boxdonan mes tabata mesun confundi cu e fanaticonan di pelea tocante pakico dos persona di Cali-

fornia lo bay otro banda di e pais pa nan enfrentamento dia 20 di april. “Mi kier pa e pelea aki toch ta na Vegas. Mi ta riba record bisando esey toch, pero mi no kier bay mucho den dje,” Garcia a bisa dialuna na su hotel na New York, un dia prome cu e boxdonan ta bay tin su conferencia di prensa di apertura. “Unda cu e pelea aki ta bay tuma lugar, e ta bay tuma lugar, pues mi ta contento pa bringa na NYC. Mi no tin problema. Mi ta bay trece e energia y e ta bay ta great. E peleanan mas grandi di boxeo ta na Las Vegas, y ambos boxdo tabatin un aña pasa. Garcia (24-1, 20 KO) a keda para pa Gervonta Da-

vis na april, un luna prome cu Haney (31-0, 15KO) a defende su titulongan contra Vasiliy Lomachenko den su ultimo pelea na lightweight prome cu move na e limite di 140 libra.

Pero cu Canelo Alvarez, e draw mas grandi di boxeo, spera pa bringa eyan dia 4 di mei, De la Hoya a bisa cu tabatin riesgo cu e fanaticonan no lo paga pa ticket pa dos evento asina cerca di otro. Ademas, e ta kere cu tin mester pa trece Garcia, kende ya tin hopi siguido riba rednan social, na un audiencia nobo. Haney ta parece di tin menos problema. El a bringa un biaha como profesional na New York, den e Theater at Madison Square Garden, y tabata spera pa bolbe na e ciudad dilanti di un publico mas grandi – maske Las Vegas awo ta hogar di e producto di San Francisco.

“Mi djis tabata sa cu e lo ta na Vegas, pero mi no ta rabia pa New York,” el a bisa. “Esaki ta un tremendo oportunidad, e capital di media di mundo. Tin asina hopi wowo, pues nos por haci esaki mesun grandi cu e mester ta y mi ta kere e ta bay ta great. Mi ta kere e ta bay ta mesun bon cu si e tabata na Vegas.”

Garcia, kende a bringa un biaha como profesional na New York, a lubida su duda origi-



nal, maske ainda ta cuestiona e logica. “Mi punto ta, ora mi bin East Coast mi kier bringa un persona cu tin laso cu East Coast, cu ta di New York. Talbes bringa Teofimo akinan,” Garcia a bisa, referiendo na Teofimo Lopez, kende tambe tin un titulo di 140 libra. “E ta di Brooklyn, esey lo ta great. Pero bringa Devin Haney, ta dos bringado di West Coast. Mi sa cu nos por hacie, nos por pon’e sold out, pero e djis no ta make sense pa mi.” E ta make sense pa De la Hoya, maske e ta concede cu nan ta bay gana menos placa cu na Las Vegas pa motibo di e gastonan mas halto asocia-

cu contratistanan trahando na e evento. Pero e ta bisa cu toch e ta bay atrae e live gate di mas grandi den historia di New York.

Barclays Center ta parece ansioso pa tene despues di keda afo di e peleanan desde cu a tene Deontay Wilder su knockout di Robert Helenius den prome round na october 2022. E arena anteriormente tabata activo den boxeo desde su apertura na 2012 y un vocero di e arena a bisa cu tin intencion pa continua buscando eventonan den futuro, agregando cu conflictonan di schedule a preveni Barclays di tene boxeo aña pasa.

Furor pa supuesto gesto obsceno di Ronaldo den partido di liga Saudi

(AP) — Cristiano Ronaldo segun reportahenan ta siendo investiga, pa motibo di a haci un gesto supuestamente ofensivo mientras tabata hunga pa club Al Nassr den e Saudi Pro League.

Imagen y video riba rednan social a parece di muestra Ronaldo ta cup su horea cu su man, y repetidamente pusha su man dilanti cerca di su

pelvis, aparentemente dirigi na sostenedornan di team rival, Al Shabab. E incidente a sucede riba diadomingo, despues cu Al Nassr a derota Al Shabab 3-2.

Den background, e multitud tabata gritando “Messi.” Lionel Messi ta e rival historico di Ronaldo den futbol.

Mientras cu e incidente no a keda captura pa camaranan

di television, critica contra e delantero Portugues di 39 aña di edad si a yega lihe. Reportahenan den medianan di comunicacion local ta bisa cu e Federacion di Futbol di Saudi Arabia a habri un investigacion.

Ronaldo por ta enfrentando un suspension. Proximo wega di Al Nassr ta riba diahuebs.

Ronaldo, kende a transferi na e club basa na Riyadh na december di 2022, ta lider di anotacion den e liga cu 22 gol. El a anota e gol di apertura contra Al Shabab, un penalty den prome mita.

Al Nassr ta sigui tras di lider di e liga, Al Hilal, pa cuatro punto, despues di a hunga un wega mas.

Al Nassr tambe ta den quart final di Asian Champions League, un torneo cu e club nunca a yega di gana.



Exitoso Full Moon Bike Tour di IBI SA Sportcentrum San Nicolas

Diasabra 24 di Februari pa 6:30pm a tuma lugar e di dos Full Moon Bike Tour di IBI SA Sport Centrum San Nicolas. Contrario na 2023 e participacion e biha aki a kibra tur expectativa.

Gruponan di diferente clubnan di ciclismo hunto cu individualnan di e bario, tanto grandi y chikito a participa den un actividad acompaña cu musica creando un ambiente unico. Hobennan for di 10 aña y tambe adultonan, a participa uniforma y acompaña pa Polis Motorisa y tambe acompaña pa Cruz Cora di Aruba.

E Full Moon Bike Tour IBI-



SA Sportcentrum San Nicolas 2024 a haya 131 interesado di cual 80 a participa.

E entusiasmo entre e participantenan tabata notabel asina marcando e evento como exito rotundo. Na final y den cura di IBI SA Sportcentrum San Nicolas tur participante por a refresca na mes cu awa,

bebida hidratante y come un fruta.

IBi SA Sport Centrum San Nicolas ta hopi contento cu e acogida positivo di e participantenan y ta gradici pa tur esnan cu a contribui na e exito di e evento. E feedback ricibi lo wordo tuma na cuenta pa futuro Bike Tours, cu ta wordo organisa den fu-



turo. Nos ta invita tur e participantenan y tambe publico en general pa wak algun potret di e bunita experiencia aki y nos ta pidi pa keda pendiente di futuro actividadnan organisa pa IBI SA, cu lo wordo comparti via nos plataforman social di Facebook y Instagram IBI SA Aruba.



Gihae Gymnastic's ta logra 1st place overall den Nivel 1 na Gasparilla Gymnastic's Competition 2024



Ariba e tarima International di e Gasparilla Gymnastic's Competition 2024—caminda mas di 7000 atletanan rond mundo a bini hunto pa competi contra otro, GIHAE Gymnastics a demostra un bes mas cu nan nivel y calidad di gymnasia ta uno

sin precedente.

Atletanan a termina respectivamente na e siguiente puestonan ALL AROUND individual:

Nivel 1:
Zoey Chung 2 lugar
Yuna Fajardo 2 lugar



Nimra Martinus 5 lugar
Kalisha Inacio 5 lugar
Leanne Rivero 7 lugar

Nivel 2:
Romy Fajardo 4 lugar
Isabella Rodriguez-Barerro 5 lugar
Alinah Polanco 8 lugar

Nivel 3:
Ruzinaily Romero 5 lugar
Jayselle Geerman 11 lugar.

Nivel 4:
Lyvah Bikker 1 lugar
Amalia Tromp 1 lugar
Kaelyn Palma Villegas 2 lugar
Alizey Polanco 7 lugar



Nivel 6:
Malaki van Dinter 6 lugar
Jeandienne Koolman 8 lugar

Nivel 8:
Casey Provence 5 lugar
Daenah Beke 6 lugar

Lotto pa Deporte lo ta bou di maneho atrobe di Fundacion Lotto pa Deporte Aruba

Recientemente, Minister di Enseñansa y Deporte Endy Croes a reuni cu Sr. Junny Figaroa, kende ta e director actual di Fundacion Lotto pa Deporte Aruba (FLPD). Durante e reunion aki, Sr. Junni Figaroa a trece algun novedad en cuestion e traspaso di Lotto pa Deporte pa Fundacion Lotto pa Deporte y den esaki ricibi Jaarrekening cu ta di vital importancia pa e traspaso tuma

luga.

Jaarrekening 2020 a keda cla na final di december 2023. Sr. Figaroa a indica cu ta trahando duro pa finalisa Jaarrekening 2021 den e luna di februari y den e luna di maart termina Jaarrekening 2022. Banco ta den espera di esakinan pa asina haci e traspaso di CBN Aruba y CBN pa Fundacion Lotto pa Deporte Aruba bek. Sr. Figaroa a duna un splicacion amplio

di e proceso y tur e trabounan cu a tuma luga riba nivel di e comision cu ta trahando riba esaki, basa riba un contract cu ya ta firma caba desde inicio di aña 2023. Asina cu cumpli cu tur Jaarrekening, ta actualisa cu tur banco y cumpli cu tur locual a palabra den e contract, Canadian Bank Note (CBN) y CBN Aruba por haci traspaso di e operacion completamente den man di Fundacion Lotto pa Deporte bek.



Arbeidsmarktregistratie (AMR) di DPL tin un sistema nobo online!

AMR ta cuminsa cu un sistema nobo (online), consecuentemente no mester traha un cita mas pa entrega AMR 2024. Esaki lo por hay'e riba nos website: www.dpl.aw



Prome paso ta: Registra bo Compañia (Request Company Account) Aki e Compañia lo mester yena su informacionnan, agrega e documentonan cu nos ta pidi y mand'e pa nos. Ora cu nos ricibi e Registracion di e Compañia, nos ta controla y si tur informacion y documento ta corecto, nos ta ACTIVA e Compañia su account. Solamente si tin falta di documento(nan), nos lo

manda un coreccion via e-mail cu loke a yena den Registracion di e Compañia. Manera cu ACTIVA e Compañia su Registracion, por sigui sin cita, pa yena e AMR 2024.

Registracion di Compañia 2024:

1. Bay riba nos website: www.dpl.aw
2. Bay riba e balki mas ariba y click riba: FORMULARIONAN
3. Scroll bay abou y ta click

riba: PROGRESA

4. Riba e screen di LOG IN, na e parti mas abou, unda ta wak "Is it a company?", banda di dje tin un hoki di REQUEST COMPANY, ey mester click ora un Compañia ta bay registra pa prome biaha.

Pa mas informacion of pa cualkier pregunta por yama nos libremente na 521-5555 / 521-5510 of por manda nos un e-mail na: amr@dpl.aw

Gruponan uniforma cu meta comunitario ta wordo invita pa participa den desfile nacional



Pa medio di e comunicado aki Comision Celebracion Dianan Nacional (CCDN) ta informa cu e aña aki un biaha mas lo organisa e desfile nacional di gruponan uniforma riba Dia di Himno y Bandera 2024 dilanti Plaza Libertador Gilberto F. 'Betico' Croes despues di e acto protocolar dia 18 di maart 2024 proximo.

E desfile aki ta pa duna reconocimiento na nos gruponan uniforma cu ta traha na bienestar y tambe na desaroyo di nos hobennan den nos comunidad manera scouting,

gruponan gubernamental uniforma, gruponan di deporte uniforma y gruponan di baile den trahe folklorico.

Desde awe por registra pa participa y ricibi e formulario di inscripcion via nos e-mail adres ccdn@cultura.aw y tene na cuenta cu e ultimo dia pa inscribi ta diabierna 1 di maart 2024 pa asina e comision por planifica e logista di e desfile corectamente. Mester informa cu no ta permiti bestia y tampoco vehiculo di motor den e desfile. Pa tuma contacto mas lihe por WhatsApp na +297 562-9129.

Scoge bo proyecto preferi pa Aruba Doet 2024- Haci bon, pasa bon!



Aruba Doet ta invita e comunidad di Aruba pa bin "Haci bon y pasa bon"! Ariba diabierna 15 y diasabra 16 di maart 2024 CEDE Aruba, den cooperacion cu Oranje Fonds, lo ta organisando e di 12 edicion di Aruba Doet!

Actualmente tur proyecto cu ta forma parti di Aruba Doet 2024 cu ta buscando e aporte di boluntarionan, ta visibel ariba nos website. Subi www.arubadoet.com y registra awor!

Tin un total di 172 proyecto pa kies for di dje. Aruba Doet ta invita tur esunnan cu no a registra ainda como boluntario, pa scoge entre proyectonan di verf, embebecemento di un hardin, yuda na un animal shelter of yuda cu un actividad social cu nos grandinan of esun nan mas vulnerabel di nos comunidad.

Pa mas informacion tocante Aruba Doet por bishita e website of WhatsApp 5611644.

Resultado Sorteo <i>fecha</i>			
Cadena Alexander Lottery ta presenta resultado di weganan di suerte			
DIARIO	KORSOU	SUPER4	FLAMINGO
7420	0199	5096	0686
3941	8754	SUPER5	1843
0280	8937	-	5046
MERDIA	ANOCHI		
			Joker Letter
Sorteo # 4193	Sorteo # 8180	Sorteo #	Proximo Jackpot
4963	0629	0 x Jackpot	500.000,-
9582	2418	0 x Match 4+	
6226	8426	0 x Match 4	
MULTI-X	fp	0 x Afl. 12,00	
X2	BIG 4		01-13-19-21-22
BIG 4	Sorteo # 7224	Sorteo # 6399	Proximo Jackpot
Sorteo # 4193	5793	0 x Jackpot	56.000,-
1141	MULTI-X	8 x Match 4	
MULTI-X	fp	112 x Afl 8,00	
X2	OFF		Mega Ball
Sorteo # 2249	Sorteo # 1929	Sorteo #	Proximo Jackpot
8930	1478	0 x Jackpot	650.000,-
ZODIAC	ZODIAC	0 x match 4	
Sorteo # 4193	Sorteo # 5983	0 x Afl. 500,00	
8631	6764	0 x Afl 50,00	
Aries	Acuario	0 x Afl. 15,00	Afl. 925.000,-
LUCKY 3	LUCKY 3		
Sorteo # 1067	Sorteo # 913		
968	718	Sorteo #	
MULTI-X	MULTI-X		
X2	x2		



Dokter na warda

Oranjestad San Nicolas
Hospital Imsan
7:00 pm / 10:00 pm 24 ora

Botica na warda

Oranjestad: San Nicolas:
Eagle Centro Medico
Tel. 587 9011 Tel. 584 5794
EMERGENCIA 911

POLIS

Oranjestad 100
San Nicolas 104
Santa Cruz 105
Noord 107
Tip Line 11141
Brandweer 115
Ambulance 911
Hospital 527-4000
Imsan 524-8833
Warda Costa 913
Seguridad Nacional 11911
Cruz Cora 582-2219

BOTICA

Aloe 584-4606
4 Centro Medico 584-5794
Central 585-1965
Dakota 588-7364
Del Pueblo 582-1253
Eagle 587-9011
Kibrahacha 583-4908
Maria 585-8145
Di Servicio Noord 586-4606
Oduber 582-1780
Paradera 588-6638
San Lucas 584-5119
San Nicolas 584-5712
Santa Anna 586-8181
Santa Cruz 585-8028
Sero Preto 584-4833
Trupial 583-8560

UTILIDAD

Setar 117
Web 525-4600
Elmar 523-7147

FUNERARIA

Aurora 588-6699
Royal Funeral H. 586-4444
Ad Patres 584-2299
Olive Tree 584-8888

Servicio di Taxi

Aruba Transfer Tour & Taxi C.A.
Tel: 582 2116 / 582 2010

Taxi Adres Services (24h)
Tel. 587 5900

A1 Taxi Services Aruba
Tel: 587-8850
Tel: 280-2828
Whatsapp: 592-7024

Cas Di Cultura

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

**Fundacion Contra
Violencia Relacional**
Tel: 583-5400

**Fundacion Autismo
Aruba**

Irenestraat 21 Aruba
297-588-1179

**Fundacion Pa Nos
Muchanan**

Cumana 2 Aruba
297-583-4247

**Fundacion Tel Pa
Hubentud**

Wilhelminastraat 19
Aruba
297-588-6138

**Koningin Wilhelmina
Fonds**

Spinozastraat 9 Aruba
297-582-0412

Mary Joan Foundation

Sabana Blanco 8 Aruba
297-588-9999

Rode Kruis Aruba

Pedro Gallegostraat 14
Tel. 297-582-2219
Fax 588-3376

Famia Planea (SBVO)

Avenida Milio J Croes 17
B Aruba
297-588-9591
www.famiaplanea.org
famiaplanea@hotmail.com

**Stichting Fundacion
Guia Mi**

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord
(close to the hotels)
Tel: 736-2952 or
593-7081

Registra:

Invitacion pa Celebracion di Dia Internacional di Hende Muhe

Gobierno di Aruba ta extende un invitacion na comunidad di Aruba pa uni cu nos den e celebracion di Dia Internacional di Muhe. E ocasion di empoderamento, celebra mundialmente riba 8 di Maart, ta un reconocimiento na e forsa inkerantabel y logronan remarcabel di hende muhe rond mundo.

Gobierno di Aruba ta reconoce e contribucionnan valioso di hende muhe den nos sociedad y ta, organisa un celebracion special pa honra nan resiliencia sin igual, liderazgo, y nan dedicacion. E evento aki ta sirbi como plataforma pa refleha riba e progreso logra pa igualdad di genero y pa reafirma nos compromiso pa avansa e derecho y empoderamento di hende muhe den tur situacion di bida, inspirando inclusion di cada hende muhe.

Registracion pa e celebracion aki ya ta tumando lugha y cuponan a cuminsa yena y ta yenando hopi lihe. Prome Minister ta encurasha tur esnan interesa, si ainda bo no a registra, pa haci esaki mas pronto cu ta posibel debi na espacio limita. Pa haci esaki, por bay riba pagina di Facebook di Gabinete Wever-Croes y scan e QR code cu lo dirigi bo na e pagina di registracion.

Tambe, en conexion cu Dia Internacional di Muhe, Central Bureau of Statistics (CBS) recientemente a lanza e encuesta tocante e inclusion di hende muhe den e comunidad di Aruba. E encuesta ta consisti di preguntanan tocante con hopi hende muhe ta wordo inclui riba diferente tereno den nos comunidad. Pa yena e encuesta aki, por bay riba pagina di Facebook di Gabinete Wever-Croes y di CBS Aruba pa e link na e encuesta.

Uni cu nos pa celebra e diversidad, logronan, y poten-

FOR SALE
Resale Timeshare
Caribbean Palm Village
One bedroom, 2 bathroom,
ground floor, pool view.
Winter season, floated week
\$4.000.00
Cell. 592 1575
218040



cial di muhe for di tur sector di bida y hunto ban crea un balansa pa unidad, solidaridad, y empoderamento entre hende muhe na Aruba. Fecha: 8 di Maart, 2024 di 8:00 am pa 12:00 pm na Renaissance Convention Center.

“Bo presencia na e evento bunita aki lo enrikece nos

celebracion y contribui na e esfuersonan pa empoderamento di hende muhe. Hunto, nos ta sigui lucha pa un sociedad mas inclusivo y husto unda cada hende muhe y mucha muhe por prospera y realisa nan potencial maximo”, Prome Minister Evelyn Wever-Croes a expresa.

Pronostico di tempo

Tempo:
Awe tardi y awe nochi: parcialmente nubla y generalmente seco
Den marduga y mañan: parcialmente nubla y no ta spera awasero di importancia



Temperatura maximo 31 grado Celsius
Temperatura minimo 26 grado Celsius
Indice di calor (heat index) den y rond di oranan di merdia: 32 pa 37 grado Celsius
UV index: 10

Bahada di solo : 6:48 pm
Subida di solo : 6:57 am.

Biento:
Modera for di direccion generalmente oost;
Forsa 3 te 4 (11 te 30 km/ora, 7 te 16 nudo).

Den dia basta fuerte te posiblemente fuerte den rafaga;
Forsa 5 te 6 (31 te 50 km/ora, 17 te 27 nudo).

Situacion general di tempo pa proximo 24 ora:
Un atmosfera regional relativamente abou na humedad lo pone clima seco

domina. Sinembargo, un aumento leve di humedad den proximo dianan lo por produci un awasero pasahero riba cierto partinan di e isla. Mas aleu por bisa cu stof fini di Sahara den concentracionnan varia lo stroba visibilidad y produci aire di calidad abou. Personanan cu tin trastorno respiratorio mester tene esaki na cuenta.

Condicionnan maritimo/ estado di lama:
Na partinan protegi di costa: keto, rond di 1 pia.
Na partinan zuid: tranquil te modera, entre 2 pa 3 pia.
Na partinan oost te noordwest di costa: generalmente modera cu olanan di 3 pa 4, localmente 5 pia.

Aurora
Royal Pray
Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Habri portanan santu pa mi,
mi ke drenta y alabá Señor.
Ata e porta di Señor akí,
tur e fielman ta pasa den dje.
Mi t' alabá bo pasobra B'a skucha mi,
pasobra B'a manda mi salbasyon.
Salmo 118: 19-20-21

Cu dolor na nos curason, nos ta participa
fayecimento di:



John Albert Croes
Mihor conoci como "John Pizza"
*19-08-1955 - †22-02-2024

Su mayornan: †Marcial "Charly" Croes y †Theresita Croes-de Mei

Na number di su:

Esposa: Jeanette Croes-Fingal

Yiunan: Monique Correa
Jeanine Correa y Zin Habibe
†Susy Croes y †Lisandra Dijkhoff

Nietonan cu ela stima hopi: Kyara Kerkman y Kayle Croes
Maeve y Vienna Habibe

Rumannan: †Hubert Croes
Tico y Pascualita Croes-Vrolijk y familia
†Rudolf y Florencia Croes-Ras y familia
Erwin y Lupina Croes-Croes y familia
Wilma y Pablo Dijkhoff-Croes y familia
†Melva y Eric Feliciano-Croes
Edward y Angela Croes-Torres Mesa y familia

Sua y cuñanan: †Henrick y †Regina Fingal-Bareño y familia
†Genoveva y Obildo Croes-Fingal y familia
Elvia Fingal y familia
Siegfried y Grace Fingal-Wouters y familia
Swinda y Mengelito Kelly-Fingal y familia
Marlene y Arcolino Maduro-Fingal y familia
Ronald y Lisette Fingal-Lacle y familia
†Roycy y Ruth Fingal-Croes y familia
Mariska Fingal

Su ayudante: Ana Castellar-Guzman

Su ihanan, primo y primanan, bon bisñanan y conocirnan. Tur su clientenan, amigonan di Gospel y Oracion y chefnan. Amigonan di Motorcycle. Tur su trahadornan. Su amigo di semper Roberto Pablo, Mariflor Nicolaas, Su nurse LC Franckowiak, amigo di cas Greg Croes.

Demas familia: Croes, Fingal, Correa, Kerkman, Vrolijk, Ras, Dijkhoff, Feliciano, Torres-Mesa, de Mei, Roos, de Jong, Lacle, Halabi, de Veer, Semerel, Hess, Maduro, Boekhoudt, Gil, Wever, Winterdal, Wouters, Kelly, Tromp, Habibe, Nicolaas.

Acto di entierio lo tuma lugar diahuebs 29 di februari 2024 for di 12'or di merdia pa 4'or di atardi na Misa Sta. Filomena na Paradera.

Oportunidad pa condolencia ta diaranson 28 di februari 2024 di 7'or pa 9'or di anochi na Aurora Funeral Home na Cumana

Nos ta pidi disculpa si den nos dolor nos a lubida un of otro familia.

Aurora
Royal Pray
Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Lagrima y floran por seca, su recuerdonan y tur
loke el a haci y significa pa nos, lo keda graba pa
semper den nos mente y curason.

"Cerca Dios mi alma ta na paz, ta di DJ'E mi
salbacion ta bin"

Salmo 62:1

Cu dolor na nos curason, nos ta participa
fayecimento di nos ser stima:



Pedro Petrocchi
Mihor conoci como "Perus"
*18-11-1928 - †23-02-2024

Na Number di:

Su Esposa: † Maria Petrocchi - Jacopucci
Yiunan: Rosendo & Ethelyn Petrocchi
Rita & Juan Kock

Maria Genoveva "Baby" Petrocchi
Antonio "Tony" & Reina Petrocchi
Vda. Enrica "Eka" Dijkhoff
Jorge Petrocchi & Shahaira Labad
Nieto, Nietanan y tata Nieta:
†Carolyn Kelly y yiunan Jeanith Quandt y
yiunan

Jacqueline Quandt Patrick Petrocchi & Davina
Tromp y yiu
Derrick & Magaly Dijkhoff Roselyn & Marco
Berlis y yiunan

Robertino Petrocchi Kimberly & Salam Hadi y
yiunan na hulanda Jorginho & Maya Petrocchi
Jahmil & Noryolis Petrocchi y yiunan
Marcy Scholten Julien Dijkhoff & Glenn
Kemp

Litza Scholten y yiu Zaïro Petrocchi na hulanda
Milan Petrocchi

Ruman nan: †Catharina Petrocchi †Theresita
Dijkhoff

†Petra Franken †Angelico Petrocchi
†Laureano Petrocchi †Evaristo Petrocchi
†Gabriel Antonio Petrocchi

Sua y Cuñanan, subrino y subrinanan, ihanan,
bisiñanan, conocirnan, ex coleganan di Lago y
demas famianan den exterior.

Demas Familia:

Jacopucci, Petrocchi, Tromp, Quandt,
Kock, Dijkhoff, Labad, Scholten, Arends,
Hadi, Kemp, Berlis, Croes, Franken, Brete,
Krozendijk, Henricus, Giel.

Disculpa nos si den nos tristesa nos por a
lubida algun familia.

Un palabra di gradicimento na: Maris Stella
specialmente afdeling Aloë

Anochi di condolencia lo ta diamars 27
Februari 2024, 7pm pa 9pm na Aurora Funeral
Home.

Acto di entierio lo tuma lugar diaranson 28 di
Februari 2024, 1pm pa 4pm na Aurora Funeral
Home. Saliendo despues pa Santana Catolico
na Noord.

Despues di entierio nos lo no ricibi bishita di
condolencia na cas.

Aurora
Royal Pray
Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

"Onkruid vergaat niet"



Lucie J.H. Delière-Lataster
"Lucia"
*03-07-1958 - †25-02-2024

Gelegenheid om afscheid te nemen wordt later
bekend gemaakt

Lieve Sjaerd,



Je was er altijd met je persoonlijke
aandacht, je glimlach en je knipoog.

Het is onmogelijk iemand te vergeten,
die zoveel gaf om te herinneren.

We houden van je en we gaan je missen.
Je vrienden van Aruba



Tot Talent Un-limited is het nooit gekomen....

Maar wel super veel plezier gehad!

Dankjewel lieve Sjaerd.



Aurora
Royal Pray
Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Bou alanan di dios mi ta sigur mi refugio, mi forti, mi dios, den kende mi ta pone mi confiansa - Salmo 91



Shamila Urseilla Benitez Koolman
Cariñosamente yama Sha of Shami
08-Juni-1970 - 23-Februar-2024

Acto di entiero lo wordo anuncia despues

Aurora
Royal Pray
Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Rev: 12:4 "He will wipe away every tear from their eyes, and death shall be no more, neither shall there be mourning nor crying nor pain any more, for the former things have passed away"

It is with deep sadness that we must inform you of the passing away of our beloved brother, father, grandfather uncle:



Tyrone Jackson Brown
Better known as: "Prano".
April 15th 1948 - † February 24th 2024

Left to mourn
Sweetheart Valerie Dawnes Daughter
Keisa Hilman-Brown
Son-in-law Leonard Hilman
Stepchildren Shawn Allicock
Travis Tucker (Tip toe)

Siblings Barbara Didder
Juan & Monica Didder-Adams & child
Rayborne Didder & children
Robin-Ann Didder & children

Related to Webb, Nedd, Henry, Didder, Adams, Brigitha, Calmera, Cijntje, Danies, Dawnes, Mata, Hilman.

A special thanks goes out to those who have supported us during this difficult time, family, friends, neighbors, Lifeline drivers, wound department of the poly clinic, and Dialysis department of IMSAN, and HOH & Wit Gele Kruis.

We apologize if during this time of grief, we have forgotten to mention names.

The funeral service of Tyrone Jackson Brown will take place on Wednesday February 28th 2024 from 2 pm at Pray Funeral Home. The deceased will be laid out and viewed from 2 - 4 pm. The service will commence at 4 pm. Cremation will be held in a closed family sitting.

We regret that after the funeral service we can't accept condolences at home.

Aurora
Royal Pray
Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Een groot gemis, een groot verdriet, maar door alle herinneringen die wij hebben vergeten wij hem niet.

Na een voltooid leven, zoals Peter zelf zei, is hij van ons heen gegaan op weg naar zijn laatste reis, thuis omringd door zijn familie.

Wij gaan onze 'rots in de branding' en leermeester enorm missen.

Peter Westera
"bekend als opa bij velen"

29 juli 1939 - 24 februari 2024



Amersfoort: Michiel & Veronica
Patrick, Berend, Rowen

Leusden: Irene & Chris
Britt, Bo, Benthe

Aruba: Aldert & Samanta
Amanda, Ethan, Nathan

Peter zal naar zijn laatste wens worden gecremeerd in besloten familiekring.

Gelieve geen bezoek aan huis.
Correspondentieadres: Familie Westera,
Sabana Liber 76, Aruba of
Per mail: appiesammy@hotmail.com

Aurora
Royal Pray
Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita
y
Laga esakinan termina den tur buniteza.
Cado Wever.

Cu inmenso dolor na nos curason, nos ta anuncia fayecimento di:



Germania Ondina Martinez
Cariñosamente conoci como: "Oma" of Tia"
*28-05-1928 †23-02-2024

Acto di entiero lo wordo anuncia despues.

BONDIA
ARUBA

Bo ta stima bo yiu
BISA NO Na abuso di
Mucha...
HASI USO DI CARSEAT

Pareha Mericano probablemente a fayece despues di ser tira for di catamaran secuestra

(AP) - Un pareha Mericano di edad mas grandi ken su catamaran a ser secuestra siman pasa pa 3 prizonero scapa, probablemente a ser tira den lama y a fayece, polis di Grenada a bisa dialuna. E anuncio aki ta un golpi na esunnan cu tabata buscando independientemente pa Ralph Hendry y Kathy Brandel y tabatin speransa cu te ainda nan ta bibo.

Don McKenzie, comisario di polis pa Royal Grenada Police Force, a bisa na un conferencia di prensa cu e 3 prizoneronan a scapa dia 18 di februari for di Sant George Police Station. Nan a secuestra e catamaran "Simplicity" dia 19 di februari y a dirigi nan mes na St. Vincent y Grenadines, unda nan a ser aresta diaranson pasa. "Informacion ta sugeri cu mientras nabegando entre Grenada y St. Vincent, nan a deshaci di e doñonan," McKenzie a bisa.

Ora cu a keda pidi detaye, el a bisa cu "te ainda nos no tin nada conclusivo pa bisa cu e individuonan ta morto. Te ainda, a pesar di loke ta aparenta di ta un probabilidad abao, tin speransa cu nan lo aparece



bibo un caminda."

El a nota cu e tabata "sumamente limita" den loke e por comparti cu publico tocante e caso pa motibo cu e investigacion te ainda ta andando pa motibo cu autoridnan di Grenada te ainda no tin hopi informacion. "E informacion cu mi ta posee ta limita y por ta considera 'second-hand' pa motibo cu mi a tin dialogonan hopi limita tocante e detayenan di e investigacion cu

mi coleganan na St. Vincent," McKenzie a bisa.

E asociacion Salty Dawg Sailing Association a bisa cu Hendry y Brandel tabata "veterano" y miembronan di hopi tempo caba. Segun e asociacion e pareha a uni aña pasa su Caribbean Rally for di Hampton, Virginia y Antigua unda nan lo pasa winter nabegando Caribe.

A crea un pagina di GoFund-

Me pa recauda fondo pa e pareha su famia unda a nota cu recientemente Brandel a bira wela pa prome biaha y cu e comunidad ta "destrui" cu e tragedia. "Kathy y Ralph, aventureronan experiencia, a pasa nan retiro nabegando riba Simplicity, pasando tempo na New England y disfrutando di e calor di winternan Caribense," e pagina a comenta.

McKenzie, comisario di polis

di Grenada a bisa cu a manda un ekipo di 5 persona pa yuda cu e investigacion na St. Vincent. Tambe el a informa cu polis a lansa un investigacion tocante e escape di e prizoneronan y ta mirando si esaki tabata un "fayo di sistema" of un caso di "eror humano. Tur aspecto di e investigacion a kita riba mesa," el a comenta, agregando cu e stacion di polis unda e 3 hombernan tabata deteni tabatin "suficiente siguridad pa preveni cu un incidente manera esaki lo sosode."

Ora cu reportero a puntra dicon e 3 hombernan cu a ser aresta a permanece den detencion na e stacion di polis na luga di bay prizon, Vannie Curwen a bisa cu prome nan mester a mira un magistrado cu lo dicidi si lo pone un suma pa nan libertad of duna ordo pa nan permanece den detencion.

E prizoneronan scapa, di 19, 25 y 30 aña di edad a ser acusa algun luna atras di robo cu violencia. E homber mas grandi tambe a ser acusa cu violacion, 3 intento di violacion y 2 agresion indecente causando daño segun polis di Grenada.

Prome Minister Palestino ta entrega retiro di gobierno marcando un movida cu por habri porta pa reforma

(AP) - E Prome Minister Palestino a anuncia e retiro di su gobierno riba dialuna, cual ta habri caminda pa un cambio den e autoridad Palestino, cual Merca ta spera cu lo eventualmente tuma un rol den Gaza despues di e guerra.

Varios obstaculo ta permanece den haci realidad un Autoridad Palestino renoba. President Palestino Mahmoud Abbas, ken su forsan a ser saca for di Gaza pa Hamas den aña 2007, a laga cla cu e lo kier pa e Autoridad Palestino goberna e enclave despues di e guerra. Sinembargo esaki no ta un opcion popular entre Palestinonan y Prome Minister Israeli Benjamin Netanyahu a rotundamente rechasa e idea di pone un autoridad a carga di e territorio.

Abbas a acepta e retiro dialuna atardi, segun agencia di



noticia oficial Wafa a anuncia, pero a laga e Prome Minister Mohammad Shtayyeh como e cabes di e gobierno te ora cu nombra un sucesor. No tabatin informacion tocante con hopi tempo esaki lo por tuma. E movida aparentemente ta e prome paso den

un proceso den direccion di trece reforma cu Merca ta buscando, mientras e negociacionnan internacional ta sigui pa yega na un alto-alfuego. E autoridad, crea bao tratonan di pas entre Israel y Palestina den comienso di aña 1990, ta administra parti-

nan di West Bank pero ta inunda cu corrupcion.

"E siguiente paso y su desafionan ta rekeri areglonan gubernamental y politico nobo cu ta tuma na cuenta e realidad nobo di Gaza Strip," Shtayyeh a bisa na un reunion

di e gabinete.

Netanyahu a priminti cu e lo destrui e capacidadnan di gobernacion y militar di Hamas, cual tin desde aña 2007 ta lidera Gaza. El a haci yamadonan pa Israel mantene control di siguridad den e territorio despues di e conflicto, cu oficialnan Palestino encarga di e asuntonan civil. E Palestinonan a rechasa un rol asina limita y ta busca un estado independiente den West Bank, oriente di Jerusalem y Gaza, areanan cu ta captura pa Israel.

Abbas ta anticipa di scoge Mohammad Mustafa, hefe di Palestine Investment Fund, como e siguiente Prome Minister. Mustafa ta un economista educa na Merca ken a mantene posicionnan halto den World Bank y a fungi cu posicionnan halto den Autoridad Palestino. Oficialnan Palestino ta bisa cu e tin un relacion bon y largo cu oficialnan Mericano.

Miembronan di Nacionnan Uni lo reuni pa plania con pa combati crisis ambiental den mundo

(AP) - E culpa di tuma decision mundial top tocante ambiente lo reuni na capital di Kena e siman aki pa trata con e paisnan por traha hunto pa combati e crisisnan ambiental manera cambio di clima, polucion y perdida di biodiversidad.

E reunion na Nairobi ta e di 6 sesion di Nacionnan Uni su Asamblea Ambiental y gobiernonan, gruponan di sociedad civil, cientificonan y e sector priva lo atende esaki.

Na e reunion, e estadonan miembro lo trata resolucionnan riba un rango amplio di problemanan cu e asamblea lo adopta despues di un consensus. Si un proposicion keda adopta, esaki ta crea e base pa e paisnan implementa loke a keda stipula. "Ningun di nos ta biba riba un isla. Nos ta biba riba planeta tera y nos tur ta conecta," Inger Andersen, director ehecutivo di UNEP, cual ta liderando e proceso, a conta The Associated Press prome cu e dialogo. "E unico manera cu nos por resolve algun di e problemanan aki ta pa medio di papia hunto."

Den e ultimo ronda di dia-



logo den aña 2022, tambe na Nairobi, e gobiernonan a adopta 14 resolucion, incluyendo crea un instrumento legalmente comprometedor pa caba cu polucion di plastic globalmente. Anderson a describi esaki como e trato multilateral mas significante desde e acuerdo di Paris pa limita calentamento global. Pa e aña aki su dialogo, paisnan lo trata 19 conclusion, incluyendo con pa miho restaura teranan degrada, combati tormentanan di stof y reduci e impacto ambiental di minamento di metal y mineral. Sinembargo cu paisnan den prioridad diferente, hopi biaha ta dificil pa yega un

consensus. Sinembargo, segun Andersen generalmente tin un "movimiento padilanti" riba tur resolucion di e aña aki su asamblea conoci como UNEA-6.

Cu e reunion aki su enfoque riba multilateralismo, UNEP kier agrega na e acuerdonan cu a lidera entre gobiernonan den pasado, manera e Minamata Convention pa pone control riba e protocol di mercury. Bjorn Beeler, coordinador internacional di International Pollutants Elimination Network, ta pensa cu lo tin tiki progreso riba e problemanan mas compleho manera financia-

resolucion cu kier deshaci den fase e uso di pesticidanan sumamente dañino. E resolucion, cual a ser entrega pa Ethiopia cu sponsor di Uruguay, tin e meta di crea un aliansa global di curpanan manera UNEP, World Health Organization y International Labor Organization.

"Si esaki keda haci, e lo ta sumamente significante pa motibo cu esaki lo bira e prome biaha cu nos lo mira un movimiento global riba pesticidanan sumamente dañino," Beeler a comenta.



mento pa kimiconan y desperdicio.

Beeler tambe ta premira cu lo tin oposicion fuerte na

UNEP ta anticipa cu lo tin mas di 7,000 persona presente na e dialogo cu lo culmina diabierna.

Taliban ta tene otro ehecucion dilanti miles na stadion di Afghanistan

(AP) - Taliban a tene ehecucion dialuna di un homber acusa di asesinato na Afghanistan mientras miles tabata mira na un stadion di deporte, e tercer sentencia di morto di su tipo cu a ser ehecuta den e ultimo 5 dianan.

E ehecucion a tuma lugu mientras tabatin caida di sneeuw pisa na Shibirghan, e capital di e provincia Jawzjan, unda e ruman di e homber asesina a los 5 tiro contra e acusado cu un rifle, segun un testigo. Siguridad alrededor di e stadion tabata fuerte, segun e testigo, ken a papia bao condicion di anonimidad pa motibo cu e no tabatin autorisacion di papia cu media.

Esaki tabata e di 5 ehecucion desde cu Taliban a tuma poder na Afghanistan den augustus di aña 2021 ora cu Trupan Mericano y di NATO tabata den e simannan final di nan salida for di e pais despues di dos decada di guerra. E

Taliban, a pesar di promesanan inicial di un mando mas modera, a cuminsa duna castigonan severo den publico, manera tiramento di piedra y ehecucion, poco despues cu nan a drenta den mando. E castigonan ta similar na esunnan duna durante nan mando anterior di Afghanistan den fin di aña 1990.

Corte Supremo di Taliban a bisa den un declaracion cu dialuna su sentencia di morto a ser ehecuta despues di aprobacion di e pais su 3 cortenan mas halto y e lider supremo di Taliban, Hibatullah Akhundzada. E homber ehecuta, identifica como Nazar Mohammad di e provincia Faryab, tabata acusa di asesina Khal Mohammad ken tambe ta di Faryab.

Riba diahuebs den e provincia di Gazni, Taliban a ehecuta dos homber acusa di a staca 2 victima mortalmente. Familiarnan di e victimanan a los tiro contra e dos homber-



nan tambe na un stadion di deporte, mientras miles di persona tabata mira.

Declaracionnan separa for di e Corte Supremo a bisa cu un homber y muhe acusa di

adulterio a ser golpia cu 35 laso cada un na e provincia di Balkh durante fin di siman. Dos otro persona a ricibi 30 golpi cada un, tambe durante e fin di siman, bao acusacion di comete actonan immoral.

Nacionnan Uni a critica Taliban fuertemente pa e castigonan severo aki den publico desde cu nan a drenta mando y a haci yamado na e pais su autoridad pa para e tipo di practicanan aki.